

शमूएलया निगूगु सफू म्हसीका

शमूएलया निगूगु सफू शमूएलया न्हापांगु सफूया हे ल्यं दुगु ब्व खः। थ्व दाऊदं जुजु जुयाः न्हापा दच्छिनया यह्दाय् राज्य याःगु अले लिपा उत्तरय् इस्राएलनापं फुक्क जातियात राज्य याःगु इतिहास खः। दाऊदं थःगु राज्य अप्वय्केत अले थःगु शासन बल्लाकेत देय् दुने व पिनेयापि शत्रुतलिसें गुकथं ल्वायेमाल धकाः थुकी बांलाक क्यनातःगु दु। दाऊदयात छम्ह थज्याःम्ह मनूकथं क्यनातःगु दु गुम्हय्सिनं परमेश्वरयात क्वातुक्क विश्वास याइ अले वय्कःयात आराधना याइ। दाऊद थःमनूतय्गु भलसा कायेत ताःलात। दाऊदयात थम्हं याये मास्तिवय्कूगु ज्या पूवंकेत गुबलें गुबलें दयामाया मदुम्ह व ग्यानापुगु पाप यायेत तकं लिमचिलिम्ह मनूकथं क्यनातःगु दु। तर परमेश्वरया अगमवक्ता नातानं वयागु पाप क्यनाब्यबलय् वं थःगु अपराध मानय् यात। अले परमेश्वरं बियादीगु सजाय् फयेत तयार जुल। दाऊदया जीवन व वं याःगु ज्यां मनूतय्गु नुगः त्याकल। लिपा देशय् वःगु विपत्तिया इलय् इस्राएलीतय्सं मेम्ह जुजुया इच्छा याःबलय् इमिसं मेम्ह जुजु नं दाऊदया कायपि मध्ये छम्ह जुइमा धकाः इच्छा याःगु खः।

धलः पौ

यह्दाय् दाऊदया शासन १:१-४:१२

फुक्क इस्राएलय् दाऊदया शासन

१. शुस्या दैत ५:१-१०:१९

२. दाऊद व बतशेबा ११:१-१२:२५

३. दुःखकष्ट व थाकुगु ई १२:२६-२०:२६

४. लिपांगु दैत २१:१-२४:२५

२ शमूएल

दाऊदयाथाय् शाऊल सीगु खबर थ्यंगु

१ शाऊल सी धुंकाः थथे जुल, अमालेकीतय्त त्याकाः दाऊद लिहां बल अले सिक्लगय् निन्हु च्वन।

2 स्वन्हु दुखुन्हु थःगु वसः खुनाः छेनय् धू तयाः छम्ह मनू शाऊलया पालय् वल। व दाऊदया न्ह्यःने थ्यनेवं बैय् भ्वसुलाः दाऊदयात भागि यात।

3 दाऊदं वयात न्यन, “छ गनं वयाम्ह खः?” वं धाल, “जि इस्राएलया छाउनीं बिस्युं वयाम्ह खः।”

4 अले दाऊदं वयात हाकनं न्यन, “छु खबर ज्वनावया? जितः धा।”

वं धाल, “सिपाइँतय् लडाइँ जूगु थासं लिनाहल अले लडाइँलय् यक्व मनूत सित। अले शाऊल व वया काय् जोनाथनयात नं स्यात।”

5 दाऊदं व खबर हःम्ह ल्याय्म्ह मनूयात न्यन, “शाऊल व वया काय् जोनाथन सीगु खः धकाः छं गय् यानाः सिल?”

6 व मनुखं धाल, “जि उबलय् गिल्बोया डाँडाय् च्वनाच्चनागु खः, जिं शाऊलं थःगु भालां चुयाच्चंगु अले शत्रुतय्गु रथत व सलगइपि वया ल्यूल्यू वयाच्चंगु खना।

7 लिफः स्वःबलय् वं जितः खन अले वं जितः सःतल। जिं लिसः बिया, ‘धयादिसँ, छु दु?’

8 “वं जितः, ‘छ सु खः?’ धकाः न्यन।

“जिं ‘जि छम्ह अमालेकी खः’ धकाः धया।

9 “अनंलि वं धाल, “जिगु लिक्क वयाः जितः स्यानाछव। जि आः तक नं म्वाना च्वनातिनि, अयनं जि सीत्यंगु दु।”

10 “अथे जुयाः जि वयागु लिक्क वनाः अले जिं वयात स्यानाबिया। छायाःसा व तसकं बःमलाय् धुंकूम्ह खः, व आः म्वाइ मखुत धकाः जिं सिल। अले जिं वयागु छेनय् च्वंगु श्रीपेच व ल्हातय् च्वंगु ल्हाः बाला लिकयाः उपि जिमि मालिकयाथाय् थन हयागु दु।”

11 थ्व खबर न्यनेवं दाऊदं थःगु लं खुत, अले वनापं दुपि सकलें मनूतय्सं नं अथे हे यात।

12 अनंलि इस्राएलया घरानाया शाऊल, वया काय् जोनाथन व परमप्रभुया सिपाइँत लडाइँलय् सीगुलि इपि नुगःपा दादां ख्वल, अले सन्ध्याकाः इलय् तक हे इपि अपसं च्वन।

13 अनंलि दाऊदं व खबर हःम्ह ल्याय्म्ह मनूयात धाल, “छ गनं वयाम्ह खः?”

अले वं लिसः बिल, “जि छम्ह अमालेकी खः, तर थौकन्हय् जि छिकपिनिगु देशय् च्वनाच्चनागु दु।”

14 दाऊदं धाल, “परमप्रभुं अभिषेक याःमहय्सित ल्हाः हनेत छ छतिं मग्या ला?”

15-16 छायाधाःसा “परमप्रभुया अभिषेक जूम्ह जुजुयात जिं स्यानागु खः” धकाः छं थम्हं हे धाल। अथे जुयाः दाऊदं वयात थथे धाल, “छंगु हि छंगु हे छैनय् लायेमा, अनंलि थः मनूत मध्ये छम्हय्सित वयात हमला या धकाः हुकुम बिल। अले व मनूयात कय्काः स्यात।”

शाऊल व जोनाथनया निंति दाऊद दुखं च्वंगु

17 शाऊल व वया काय् जोनाथनया निंति दाऊद थुकथं दुखं च्वन।

18 अले थ्व विलापया म्ये यहदाया मनूतय्त स्यं धकाः हुकुम यात। थ्व म्ये याशारया सफलइ च्वयातःगु दु।

19 “हे इस्राएल, छंगु महिमायात छंगु ततःज्जाःगु थासय् स्याःगु दु। तसकं बल्लाःपि सिपाइँत, छिपि गुकथं क्वदल!”

20 “गातय् थ्व खँ न्यंके मते, अश्कलोनया लँय् लँय् थ्व खँ बयबय् याना जुइ मते, मखुसा पलिशतीतय् म्हाय्पि खुशी जुइ, अले खतना मजूनपिनि म्हाय्पि लयल्यताइ।”

21 “हे गिल्बोया डॉडात, छिमिथाय् सुतिलः व वा मवयेमा, अले न छिमिथाय् अन्न सइगु बुँ हे दयेमा। छायाधाःसा बल्लाःम्ह सिपाइँया ढाल अशुद्ध जूगु दु, शाऊलया ढाल चिकं मदयाः मथी।”

22 “सीधुंकूपिनिगु हिपाखें व बल्लाःपिनिगु म्हापाखें जोनाथनया धनुष वाण गुबलें लिहां वइ मखु।

शाऊलया तरवार मस्यायकं गुबलें दापय् लिहां वइ मखु।”

23 “शाऊल व जोनाथन म्वानाच्चंबलय् मनूतय् यःपि व मनूतय्त तसकं दयामाया याइपि खः। सी धुंकाः नं इपि थ्वपाखें अलग मजू। इपि इमा स्वयाः नं अप्वः ब्वाँय् वनीपि खः, अले इपि सिंहत स्वयाः नं तसकं बल्लाःपि खः।”

24 “हे इस्राएलया म्हाय्पि, शाऊलया निंति ख्व, वं छिमित ज्वाल्ल ह्याउँसे च्वंगु तःजिगु लं फीकाबिल,

- अले छिमिगु लनय् तिसा तयाः प्वाला प्वालां थिइकाबी।”
- 25 “तसकं बल्लाःपि सिपाईत, छिपि गुकथं क्वदल!
जोनाथन छिमिगु डाँडाय् सिनाः क्वदलाच्चंगु दु।
- 26 हे जोनाथन, जिमि किजा, छंगु निति जिं विलाप याये,
छ जिगु निति तसकं यःम्ह व माया वंम्ह खः।
छंगु माया जिगु निति तसकं अजू चायापुसे च्वं,
छंगु माया मिसातय्गु स्वयाः नं बांलाः।”
- 27 “तसकं बल्लाःपि सिपाईत, छिपि गुकथं क्वदल!
अले लडाईया फुक्क ल्वाभःत गथे नाश जुल।”

2

दाऊद यहदाया जुजु जूगु

- 1 अनंलि दाऊद परमप्रभुयात थथे धकाः न्यन, “छु जि यहदाया छुं छगू शहरय् वने ला?”
परमप्रभुं लिसः बियादिल, “हूँ।”
दाऊदं न्यन, “गुगु शहरय् वनेगु?”
अले थथे लिसः वल, “हेब्रोनाय्।”
- 2 अथे जुयाः दाऊद थः निम्ह कलाःत, यिजरेली अहीनोम व कर्मेलया नाबालया विधवा अबीगेलनापं अन वन।
- 3 थःनापं दुपि मनूतय्त् नं इमि परिवारनापं दाऊदं हल अले इपि हेब्रोना व अनया शहरय् च्वंच्वन।
- 4 अले यहदाया मनूत हेब्रोनाय् वल अले दाऊदयात अन यहदाया घरानाया जुजु कथं अभिषेक यात।
याबेश-गिलादया मनूतय्सं शाऊलयात थुनाब्यूगु खः धयागु खँ दाऊदयात न्यंकल।
- 5 अनंलि वं इमित थ्व खबर छवल, “छिमिसं थः मालिक शाऊलप्रति क्यंगु भक्ति व वय्कःयाम्ह थुनाब्यूगुलि परमप्रभुं छिमित आशिष बियादीमा।
- 6 थुक्किया निति परमप्रभुं छिमित थःगु दयामाया व विश्वासबहः क्यनादीगु दु, अले छिमिसं थ्व ज्या याःगुलि जि नं थःगुपाखें दयामाया याये।
- 7 बल्ला व मग्याःम्ह जु छायाःसा छिमि मालिक शाऊल सीगु दु अले यहदाया मनूतय्सं जितः थः जुजु अभिषेक याःगु दु।”

ईशबोशेत इस्राएलया जुजु जूगु

8 थुक्रिया दथुइ शाऊलया सेनापति नेरया काय् अबनेरं शाऊलया काय् ईशबोशेतयात महनोमय् यंकल,

9 अले गिलाद, अशूरी, यिजरेल, एफ्राइम, बेन्यामीन अथवा फुक्क इस्राएलया जुजु दयक्ल।

10 इस्राएलया जुजु जूबलय् ईशबोशेत, शाऊलया काय्, पिइदँ दुगु जुयाच्चन, अले वं निदँ तक राज्य यात। यहदाया कुल धाःसा दाऊदया हे ल्यूल्य वन।

11 अले दाऊदं इमित हेब्रोनय् न्हय्दँ व खुला तक शासन यात।

इस्राएल व यहदाया दथुइ लडाइँ जूगु

12 नेरया काय् अबनेरं शाऊलया काय् ईशबोशेतया पुचः ज्वनाः महनोमपाखें गिबोनय् वन।

13 व हे इलय् सस्याहया काय् योआब दाऊदया पुचः ज्वनाः गिबोनया पुखूया लिक्क इपिं नापलात। ल्वायेत इपिं पुखूयात दथुइ लाकाः चुलिचू फेतुत।

14 अबनेरं योआबयात चिल्लाया दनाः धाल, “छिमि व जिमि ल्याय्म्हपिं मनूत मध्ये सुं वयाः जिमिगु न्ह्यःने छम्ह छम्ह यानाः ल्वाये ज्यू ला?”

योआबं लिसः बिल, “ज्यू, इमिसं अथे हे याये धकाः धाल।”

15 अथे जुयाः दाऊदया झिनिम्ह मनूतलिसे ल्वायेत ईशबोशेतया बेन्यामीन कुलयापिं झिनिम्ह मनूत दन।

16 अनंलि इपिं फुक्कसिनं थथःगु विरोधीया छयं ज्वनाः बेक्वय् चुपिं सुयाबिल। थुकथं इपिं सकलें छक्कलं क्वदल। अथे जुयाः गिबोनया व थाय्यात हेल्कत-हज्जुरीम* धकाः धाइ।

17 उखुन्हु हे तःधंगु लडाइँ जुल। अबनेर व इस्राएलया मनूत दाऊदया पुचःतपाखें बुत।

18 सस्याहया स्वम्ह काय्पिं, योआब, अबीशै व असाहेल अन हे दु। असाहेल खयलय् ब्वाँय् वनेगुलि चिल्ला थें हे ब्वाँय् वनेफुम्ह खः।

19 अथे जुयाः वं तप्यंक हे अबनेरयात लिनुलित।

20 अबनेरं लिफः स्वयाः धाल, “हे असाहेल, छ हे खः ला?”

वं लिसः बिल, “खः।”

* 2:16 २:१६हेल्कत-हज्जुरीम थुक्रिया अर्थ चुपिया बुँ खः

21 अबनेरं धाल, “जवं कि खवं वनाः ल्यायम्हपि मध्ये छम्हयसित ज्वनाः वयात हमला यानाः वयाके दुगु ल्वाभः लाकाः का।” तर असाहेलं वयात लितुलियेगु मत्वःतु।

22 अबनेरं हाकनं “जितः लिङ्गु त्वःति” धकाः ख्याच्चः बिल। वं धाल, “जिं छन्त गथे यानाः स्यायेगु? छिमि दाजु योआबयात जिं गुक्थं ख्वाः क्यनेगु?”

23 तर असाहेल थुखे उखे वने मानय मजुल। उकि अबनेरं थःगु भालाया ल्युने च्वंगु चूं वयागु प्वाथय सुयाबिल, अले भाला वया ल्युनेपाखे पिचाल। अले व लैय् हे क्वदयाः सित। असाहेल क्वदयाः सीगु थासय् थ्यने धुंकाः फुक्क अन हे दित।

24 योआब व अबीशैनं धाःसा अबनेरयात लिना हे च्वन। निभाः बीवं इपिं अम्मा डाँडाय् थ्यन। अम्मा डाँडा गिबोनया मरुभूमिइ वनीगु लैय् दुगु गीहया पुर्बय् लाः।

25 बेन्यामीनीत अबनेरपाखे मुन, अले छगू पुचः जुयाः छगू डाँडाया च्वकाय लडाइँया निंति तयार यात।

26 अबनेरं तःसलं हालाः योआबयात धाल, “छु स्यायेगु पालेगु यानां हे तं च्वनेगु ला? उकिया लिच्चः लिपा तसकं बांमलाइ धकाः छं मस्यु ला? थःथितिपिन्त लियेगु त्वःति धकाः छु छं थः मनूतय् लित हये मखु ला?”

27 योआबं लिसः बिल, “धात्थें म्वाःम्ह परमेश्वरया नामं जिं धाये, छं मधाःगु जूसा मनूत सुथय् तक हे मनूतय्सं थःथितिपिन्त लिनाजुइगु त्वःति मखु।”

28 अले योआबं तुरही पुल, अले फुक्क मनूतय्सं इस्राएलीतय् लियेगु त्वःतल। अनंलि लडाइँ दित।

29 अबनेर व वया मनूत चच्छि हे अराबा जुयाः न्यासि वनाः यर्दनया ब्यासि जुयाः वनाच्चन, अले यर्दन खुसि छिनाः इपिं सुथ बःछि न्यासि वनाः महनोमय् थ्यंकः वल।

30 योआबं अबनेरयात लियेगु त्वःताः थः पुचःयात छथाय् मुंकल। अले असाहेल बाहेक दाऊदया झिगुम्ह मनूत कम जूगु सीकल।

31 तर दाऊदया पुचलं अबनेरया ल्यूल्यू वंपिं बेन्यामीनीतय् स्वसः व खुइम्ह मनूत स्याःगु खः।

32 इमिसं असाहेलयात क्वबिया यंकल, अले बेथलेहेमय् वयागु अबुया चिहानय् थुन। अनंलि योआब व वया मनूत चच्छि न्यासि वनाः सुथय् खिउँ खिउँ धाबलय् हेब्रोणय् थ्यंकः वल।

3

१ शाऊलया घराना व दाऊदया घरानाया दथुइ यक्व दिं तक लडाईं जुयाच्चन।
दाऊद इन इन बल्लानावन, अले शाऊलया घराना धाःसा इन इन बमलाना वन।

दाऊदया काय्पि

२ हेब्रोनेय् बूपि दाऊदया काय्पि थुपि हे खः -
तःधिकःम्ह काय् अमनोन,

थ्वया मां यिजरेलयाम्ह अहीनोम खः।

३ वया माइलाम्ह काय् किलाब खः,

थ्वया मां कर्मेलयाम्ह सी धुकूम्ह नाबालया कलाः अबीगेल खः।

साहिँलाम्ह काय् अब्शालोम खः,

थ्वया मां गशूरयाम्ह जुजु तल्मैया म्हाय् माका खः।

४ कार्हीलाम्ह अदोनियाह खः,

थ्वया मां हग्गीत खः।

ठाहिँलाम्ह शपत्याह खः,

थ्वया मां अबीतल खः।

५ अले कान्छाम्ह धाःसा यित्राम खः,

थ्वया मां दाऊदया कलाः एग्ला खः।

थुपि फुककं हेब्रोनेय् बूपि दाऊदया काय्पि खः।

दाऊदनापं अबनेर मिलय् जूगु

६ शाऊलया घराना व दाऊदया घरानाया दथुइ लडाईं जुयाच्चंबलय् अबनेरं बुलुहुं
बुलुहुं थःत बल्लाका यंकाच्चंगु खः।

७ अले अय्याया म्हाय् रिशपा नांयाम्ह शाऊलया छम्ह मथ्याःम्ह कलाः दु।
ईश्वरेशेत्तं अबनेरयात न्यन, “छ जिमि अबुया मथ्याःम्ह कलाःनापं छाया घनागु?”

८ थ्व खं अबनेरं तसकं तंम्वयाः धाल, “छु धया! छं स्वयंबलय् जिं छिमि
घरानायात ध्वखा बियाः यहदा कुलनापं ज्या याइ धकाः च्वना ला? आः तक ला
जि छिमि अबु शाऊलया घराना, वया दाजुकिजापिं व वया पासापिनि भक्त खः,
अले जिं छितः दाऊदया ल्हातय् बियाः बेइमान यानागु मदु। अयनं छाया थ्व मिसाया
बारे जितः ज्यालगय् मजगु द्रुपं बियागु!

९ जिं दाऊदयात परमप्रभुं वयात जिं याये धकाः बियादीगु बचंया लागिं ग्वाहालि
मयात धाःसा परमेश्वरं हे जितः कडा सजौय बियादीमा।

10 जिं शाऊलया घरानायात क्वफायेगु अले दाऊदयात दानंनिसें बेर्शेबा तक इस्राएल व यहूदायात सिंहासनय् तयेगु ज्या याये।”

11 व अबनेरनापं तसकं ग्याःगुलि ईशबोशेतं मेगु छुं हे धाये मफुत।

12 अनंलि अबनेरं हेब्रोणय् दाऊदयाथाय् थथे धकाः दूतत छवल, “थ्व देय् सुयागु खः? झीपिं मिलय् जुइ नु, अले जि फुक्क इस्राएलयात छिगुपाखे हयेत फयांफत्तले कुतः याये।”

13 अले दाऊदं थथे लिसः बिल, “ज्यू, जि छनापं मिलय् जुइ, तर जिगु छता खँ न्येने धुंकाः जक, शाऊलया म्हाय् मीकलयात जिथाय् हयेधुंका जक छ जिथाय् वा।”

14 दाऊदं शाऊलया काय् ईशबोशेतयाथाय् नं थथे धकाः दूतत छवत, “जिं सछिमह पलिशतीया खलडीया धिबा पुलाः क्वःछिनामह जिमि कलाः मीकल जितः लःल्हानाब्यु।”

15 अथे जुयाः ईशबोशेतं मनूत छवयाः मीकलयात थः भाःत लेशया काय् पल्लिएलयाथाय्पाखें कयाः हल।

16 अबनेरं वयात छँ लिहां हुँ धकाः हुकुम मयातले पल्लिएल ख्वःख्वं बहरीम तक मीकलया ल्यूल्यू वल।

17 अले इस्राएलया थकालितय्थाय् वयाः अबनेरं थथे धाल, “यक्व न्ह्यवनिसें हे छिकपिन्सं दाऊदयात थःपिनि जुजु दयकेत कुतः यानाः वयाच्चंगु दु।

18 आः व ज्या पूर्वकीगु ई थ्व हे खः, छायाधाःसा दाऊदया बिषयल्य परमप्रभुया बचं थ्व दु, जिमि दास दाऊदया ल्हातं हे जिमि प्रजा इस्राएलयात पलिशतीतय्गु व इमि फुक्क शत्रुतपाखें बचय् याइ।”

19 अबनेरं बेन्यामीनीतय्नापं नं खँ ल्हात। अनंलि इस्राएलीत व बेन्यामीनीत राजी जूगु खँ न्येकेत अबनेर हेब्रोणय् दाऊदयाथाय् वन।

20 अबनेर निइमह मनूतनापं दाऊदयाथाय् थ्यंकः वल, दाऊदं इपिं फुक्कसित भवय् नकल।

21 अले अबनेरं दाऊदयात धाल, “आः जि वने, फुक्क इस्राएलीत छिनापं मिलय् जुइ फयेमा धकाः जिं इमित थः प्रभु महाराजयाथाय् मुंके। अनंलि छिं थः इच्छा यानादी थें शासन यानादिसँ।” दाऊदं अबनेरयात बिदा बिल, अले व खुशी जुयाः वन।

योआबं अबनेरयात स्याःगु

22 भचा लिपा दाऊदया मनूत व योआब छगू लडाइँलय थःपिन्सं लाकाकाःगु मालताल ज्वनाः लिहां वल। इपिं अन थ्यंबलय् अबनेर दाऊदयाथाय् हेब्रोणय् मदु। छायाधाःसा दाऊदं अबनेरयात बांलाक बिदा बियाः याउँक छवये धुंकूगु खः।

23 योआब व वया सिपाइँत लिहां वयाः अन थ्यंकः वल, नेरया काय् अबनेर जुजुयाथाय् वयाः याउँक लिहां वंगु खँ मनूतय्सं योआबयात कन।

24 योआब जुजुयाथाय् वनाः धाल, “स्वयादिसँ, छिं थ्व छु यानादियागु? अबनेर थन छिथाय् वःगु खः। छिसं वयात गय् यानाः अर्थे वने बियादियागु? व ला अर्थे हे बिस्युं वन।

25 छिसं नेरया काय् अबनेरयात म्ह हे मस्यू खनिसा। व ला छितः झंगलाय्त, छि छु यानाच्चवनादी धकाः सीकेत थन छिथाय् वःगु खः।”

26 योआब दाऊदयात त्वःतावन, वं अबनेरया ल्यूल्यू दूतत छवल। इमिसं अबनेरयात सीराया तुंया लिक्कसं लितब्बनाहल। तर दाऊदं थ्व फुक्क खँ मस्यू।

27 अबनेर हेबोनय् लिहां वःबलय् योआबं वलिसँ सुं मदुथाय् खँ ल्हायेगु त्वह चिनाः मू ध्वाराखाया लिक्क यंकल। अले वं थःकिजा असाहेल स्याःगुया बदला कायेत अबनेरयात चुपि प्वाथय् सुयाः स्यानाबिल।

28 अले दाऊदं थ्व खँ लिपतय् तिनिं सिल, दाऊदं धाल, “नेरया काय् अबनेरयात स्याःगुया बारे जि व जिगु राज्य परमप्रभुया न्ह्यःने सदां दोषी जगु मदु।

29 बरू योआब व वया अबुया फुक्क परिवारया छेनय् व दोष लायेमा। अले योआबया परिवारय् कइया ल्वय् वा छेगूया पुनेयःगु ल्वय् नं गुबलय् नं मत्वःतेमा। कथिया भरय् इपिं जुइमालेमा वा तरवारं पालाः स्याइपिं वा पवनाजुइपिनि सन्तानत मगाःमचाः मजुइमा।”

30 अथे हे गिबोनया लडाइँलय् अबनेरं इमि किजा असाहेलयात स्याःगुलि योआब व वया किजा अबीशैनं अबनेरयात स्याःगु खः।

31 अनंलि दाऊदं योआब अले वनापं दुपिं फुक्क मनूतय्त थःगु लं खुनाः भांग्रा फिइत व अबनेरया सीम्ह न्ह्यः न्ह्यः विलाप यायां हुँ धकाः हुकुम यात अले जुजु थः नं सीम्हया ल्यूल्यू वन।

32 इमिसं अबनेरयात हेब्रोणय् थुन, अले चिहानय् जुजु तसकं खवल। अले फुक्क मनूत नं वनापं हे खवल।

33 अले जुजुं अबनेरया निंतिं थ्व बिलापया म्ये दय्कल,
“छु अबनेर छम्ह अपराधी थें सीमाःगु ला?

34 छंगु ल्हाः चिनातःगु मदु,

छंगु तुति नं चिनातःगु मदु।

छ ला दुष्टतयगु ल्हातय् लाःम्ह थें हे क्वदल।”

अले मनूत वयागु निंति हाकनं हे ख्वल।

35 दाऊदं न्हिच्छि हे छुं मन। अले मनूतय्सं दाऊदयात छुं भपियादिसँ धकाः धायेत वल, तर दाऊदं पाफयाः थथे धाल, “सूर्य बिनावने न्ह्यः छुं नयेगु नसा थिल धाःसा परमेश्वरं जितः कडा सजॉय बियादीमा।”

36 अले मनूतय्सं थ्व खँ थुल, अले इपि मानय् जुल। जुजुं याःगु फुक्क खँय् इपि तसकं लयताल।

37 उखुन्हु इस्त्राएलया फुक्क झिनिगू कुलतय्सं नेरया काय् अबनेरयात स्याःगु खँय् जुजुया ल्हाः मदु धयागु खँ सीकल।

38 जुजुं थः मनूतय् धाल, “इस्त्राएलय् थौया दिलय् छम्ह तसकं बल्लाःम्ह, छम्ह तःधंम्ह मनू सीत धकाः छिमिसं मस्यू ला?”

39 जि अभिषेक जूम्ह जुजु जूसां सस्याहया थुपि दयामदुपि कायपिनि न्ह्यःने जि बमलाःम्ह व शक्ति मदुम्ह जूगु दु। इपि जिगु निंति तसकं हे बल्लाःपि खः। परमप्रभुं मभिंगु ज्या याइपिन्त उकिया पाय्छिगु लिच्चः बियादीमा।”

4

ईशबोशेतयात स्याःगु

1 अबनेरयात हेब्रोनेय स्यात धयागु खँ न्यनाः शाऊलया काय् ईशबोशेत ग्यात अले फुक्क इस्त्राएलीत नं तसकं ग्यात।

2 ईशबोशेतया निम्ह मनूत दु। उपिं शत्रुतय् शहर लुतय् याइपिं वया सिपाईतय् नायःत खः। इमिगु नां बानाह व रेकाब खः। इपिं बेन्यामीन कुलयाम्ह बेरोती रिम्मोनया काय्पिं खः। बेरोत नं बेन्यामीननापं हे ल्याः खाःगु दु।

3 छायाधःसा बेरोतीत☆ गिलैमय् बिस्सुं वन अले उबलयनिसँ उपिं अन हे च्वन।

4 (शाऊलया काय् जोनाथनया छम्ह काय् दु, वयागु नां मपीबोशेत खः। यिजेरलपाखें शाऊल व जोनाथन स्यूगु खबर वःबलय् मपीबोशेत न्यादँ दुम्ह खः। व खँ न्यनाः वया अजि वयात क्वबियाः बिस्सुं वंगु खः तर इपिं हथाय् चाचां बिस्सुं वंबलय् मपीबोशेत लँय्दयाः खुत्यां जूगु खः। व निपा तुति खुत्यां काःम्ह खः।)

5 छन्हू बेरोती रिम्मोनया काय्पि रेकाब व बानाह, न्हिनय् ईशबोशेत आराम कयाच्चंबलय् वयागु छै दुहां वल।

6-7 अले इपि छव काःवंगु थें यानाः छै दुने दुहां वन, छै दुने दुहां वने धुंकाः इपि ईशबोशेतया क्वथाय् तक वन। अन न्हिनय् आराम कयाः च्वंम्ह ईशबोशेतया प्वाथय् इमिसं चुपि सुयाबिल। इमिसं वयात स्यानाबिल अले इमिसं वयागु छ्यं घनाबिल। अले छ्यं ज्वनाः यर्दनया ब्यासि जुयाः चच्छि न्यासि वन।

8 इमिसं ईशबोशेतया छ्यं हेब्रोनय् दाऊदयाथाय् हल। अले जुजुयात धाल, “छितः स्यायेत कुतः याःम्ह छिकपिनि शत्रु शाऊलया काय् ईशबोशेतया छ्यं थन दु स्वयादिसै! परमप्रभुं शाऊल व वया सन्तानतय् छिगु निति बदला काःगु दु।”

9 दाऊदं बेरोती रिम्मोनया काय् रेकाब व वया किजा बानाहयात लिसः बिल, “धात्थें परमप्रभु म्वाःम्ह खः थें, सुनां जितः जिगु फुक्क कष्टपाखें छुतय् यानादिल।

10 शाऊल सीगु बां हे लात धकाः जितः खबर ब्यूवःम्ह मनूयात ज्वना, अले जिं वयात सिक्लागय् स्यानाबिया। वं हःगु खबरया निति वयात जिं अन हे सजाँय बिया।

11 तर मभिपिं मनूतय्सं छम्ह दोष मदुम्ह निर्दोष मनूयात वयागु हे छै थःगु खाताय् हेस्यात धाःसा अझ गुलि अप्वः लिच्चः बी माल! छु जिं आः छिमिसं मनू स्याःगुया बदला कयाः छिमित संसारं नाश यानाः मछवय्गु ला?”

12 अथे जुयाः दाऊदं थः मनूतय् हुकुम यात अले इमिसं इमित स्यात। इमिसं इमिगु ल्हाः व तुति पाल, अले इमित हेब्रोनया पुखू लिक्क यख्खानाबिल। ईशबोशेतया छ्यं धाःसा इमिसं कयाः हेब्रोनय् अबनेरया चिहानय् थुनाबिल।

5

दाऊदयात इस्राएलयाम्ह जुजु ल्यःगु

१ इति ११:१-३

1 इस्राएलयापि सकल मनूत हेब्रोनय् दाऊदयाथाय् मुंवाः वयात थथे धाल, “जिपि छिगु हे ला व हि खः।

2 न्हापा शाऊल जुजु जुयाच्चंबलय् नं छि लडाइँलय् जिमि सिपाइँतय् न्ह्यलुवाः जुयादीगु खः। अले परमप्रभुं छितः थथे धयादिल, “छ जिम्ह मनूतय् जवाः व शासक जुइ।”

3 इस्राएलयापि सकल थकालित हेब्रोन्नय् जुजु दाऊदयाथाय् वल। दाऊदं इपिलिसें परमप्रभुया न्ह्यःने बाचा चिन। इमिसं दाऊदयात इस्राएलया जुजु अभिषेक यात।

4 दाऊद स्विदें दुबलय् जुजु जुल, अले वं पिइदें तक शासन यात।

5 थथे धयागु, वं हेब्रोन्नं यहूदाय् न्हय्दें व खुला अले यहूदा व इस्राएलया निगू थासय् याना: यरूशलेमय् स्विस्वदें शासन यात।

दाऊदं यरूशलेम त्याकूगु

१ इति ११:६-१०

6 दाऊद जुजु व सकल इस्राएलीत वना: यरूशलेम शहरय् हमला यात। उबलय् अन यबूसीत च्वनाच्चंगु खः। यबूसीतय्सं दाऊदयात धाल, “छ थ्व शहरय् दुहां वये फइ मखु। कांपि व खुत्यापिन्सं नं छन्त ख्यानाछ्वइ।” इमिसं थथे बिचा: यात दाऊद गुबलें नं थन दुहां वये फइ मखु।

7 अय्सं दाऊदं सियोनया गद्दी त्याकाकाल। लिपा थ्व शहरया नां “दाऊदया शहर” जुल।

8 उखुन्हू दाऊदं धाल, “सुनां यबूसीतय्त दकलय् न्हापा हमला याना: त्याकी, वं दाऊदया शत्रुत ‘कांपि व खुत्यापिन्त’ लः दुगु धलं वना: नापलाक वनेमा:।” अथे जुया: दाऊदया थ्व धापू छगू उखान जुल, “सुं ‘कांपि व खुत्यापि’ दरबारय् वयेखनी मखु।”

9 दाऊद वना: किल्लाय् च्वनाच्चंगु जुया: उकियात “दाऊदया शहर” धयाहल। दाऊदं तिबः बीगु फःतयगु दुनेपाखे गद्दीया प्यखें शहर दयकल।

10 अले दाऊद झन झन बल्लानावन। छायाःसा दक्व शक्ति दुम्ह परमप्रभु वलिसे दी।

11 टुरोसया जुजु हीरामं दूतत दाऊदयाथाय् छवत। अले वं इपिं नापं सिकःमि-दकःमित व देवदास्या सिं नं छवल। इमिसं दाऊदया नितिं छगू दरबार नं दयकल।

12 दाऊदं थःत परमप्रभुं धात्थें हे इस्राएलयाम्ह जुजु दयकादीगु व वय्कःया प्रजा इस्राएलया नितिं थःगु राज्ययात तःधं यानादीगु दु धयागु खँ सीकाकाल।

13 हेब्रोन्नं यरूशलेमय् चवंबलय् दाऊदं अप्वः कला: व मथ्याःपि कला:त हल। अले इपिपाखें यक्व कायम्ह्याय्पि दत।

14 यरूशलेमय् बूपि वया सन्तानतय्गु नां थथे दु – शम्मूअ, शोबाब, नातान, सोलोमन,

15 यिभार, एलीशूअ, नेपेग, यापी,

16 एलीशामा, एल्यादा व एलीपेलेत।

दाऊदं पलिशतीतयत् बुकूगु

१ इति १४:८-१७

17 दाऊद इस्राएल न्यंकयाम्ह जुजु जुगु खँ न्यना: पलिशतीतयसं वयात ज्वनेत थ: सकल सेना छवल। थ्व खँ न्यना: दाऊद किल्लायाक् वहां वन।

18 पलिशतीत वया: रपाईमया ब्यासिइ न्यनावन।

19 अथे जुया: दाऊदं परमप्रभुयाके न्यन, “जि पलिशतीतयत् हमला याये ला? छिं इमित जिगु ल्हातय् बियादी ला?”

अले परमप्रभुं लिस: बियादिल, “हूँ, जिं इमित छंगु ल्हातय् बी।”

20 दाऊद व वया सेना बाल-पराजीमय्* वन। अन इमिसं पलिशतीतयत् बुकल। अले दाऊदं धाल, “ल: पंम्हुया पिहां व:गु थें परमप्रभु जिमि शन्नतय् विरोधय् जिगु न्ह्य:ने पंम्हुया पिहां झा:गु दु।” अथे जुया: व थाय्या नां बाल-पराजीम तल।

21 पलिशतीत बिस्सुं वंबलय् इमिसं अन थ: घ:तय्गु मूर्तिंत त्व:ताथकल अले दाऊद व वया मनूतयसं उपिं मूर्तिंतयत् कयायंकल।

22 हाकनं छक: पलिशतीत वया: रपाईमया ब्यासिइ न्यनावन।

23 उकिं दाऊदं हाकनं परमेश्वरयाके सल्लाह काल, अले परमेश्वरं वयात लिस: बियादिल, “च्वय् तप्यंक थाहां वने मते, चा:हिला: हूँ। अले मेखेपाखें थाकुरा: सिमाया न्ह्य:नेनं हमला या।

24 छं थाकुरा: सिमाया च्वका च्वकां सिपाईत न्यासि वंगु थें च्वंगु स: न्यनीबलय् हमला या, छाया:सा जि छंगु न्ह्य:, न्ह्य: पलिशती सेनायात बुकेत वने।”

25 दाऊदं परमेश्वरया आज्ञा कथं यात। अले वं पलिशतीतयत् बुकल। वं अज्ज पलिशतीतयत् गिबोननिसें गेजेर तक लँ दुच्छि हे लिनायंकल।

6

बाचाया सनू यरूशलेमय् ह:गु

१ इति १३:१-१४

1 अनलि दाऊदं इस्राएलया दक्वसिबय् बांलापिं स्विद्रु: सिपाईत छथाय् मुंकल।

2 अले दाऊद उपिं मनूतनापं परमेश्वरया सनू हयेत यहूदाया बालां* वन। व सनू करूबतय् दथुइ च्वनादीम्ह दक्व शक्ति दुम्ह परमप्रभुयागु* ख:।

* 5:20 ५:२० बाल-पराजीम या अर्थ पंम्हुया: झा:म्ह परमप्रभु ख:।

किर्यत-यारीम धका: नं धा: ☆ 6:2 ६:२ व्य २८:१०

* 6:2 ६:२ बाला थ्व थाय्यात

3 इमिसं परमेश्वरया सनू छगू न्हूगु गाडाय् तयाः डाँडाय् च्वंगु अबीनादाबया छैनं हल। अले अबीनादाबया काय्पिं उज्जाह व अहियो गाडा न्ह्याकाः यंकल।

4 इमिसं परमेश्वरया सनू गाडाय् तयाः यंकल, अले अहियो इमिगु न्ह्यः न्ह्यः वन।

5 दाऊद व इस्राएलीतय् फुक्क घराना वीणा, सारंगी, खैजडी, मृदङ्ग व भुस्याः थानाः म्ये हालाः तसकं लयल्य तायाच्चन।

6 इपिं नाकोनया खल्य् थ्यनाः, द्रुहंत लुफि हात अले उज्जाहं परमेश्वरया सनूयात सुरक्षा यायेत थःगु ल्हाः न्ह्यज्याकल।

7 थथे यानाः वं सनूयात हनाबना मतःगुलि परमप्रभु उज्जाहनापं तम्बयाः वयात अन हेस्यात। थुकथं व परमेश्वरया सनूया न्ह्यःने सी माल।

8 परमप्रभु उज्जाहनापं तम्बयादीगुलि दाऊद नं परमप्रभुनापं तम्बल अले वं व थाय्या नां फारेस-उज्जाह† तल। थौं तक नं व थाय्यागु नां व हे खः।

9 उखुन्हु दाऊद नं परमप्रभुनापं ग्यानाः थथे धाल, “आः जिं परमप्रभुया सनू गुकथं थःनापं हे तयातये फइ?”

10 वं परमप्रभुया सनू थःनापं दाऊदया शहरय् यंकेगु इच्छा मयात। बरू वं गिती ओबेद-एदोमया छैय् सनू तयके छवल।

11 थुकथं परमप्रभुया सनू ओबेद-एदोमया छैय् स्वला तक तया तल, अले परमप्रभु ओबेद-एदोम व वया परिवारयात आशिष बियादिल।

12 परमप्रभुया सनूया कारणं परमप्रभु ओबेद-एदोमया छै व वयागु परिवारयात आशिष बियादिल धकाः न्यनाः दाऊद वनाः ओबेद-एदोमया छैनं परमप्रभुया सनू लयल्यतातां खुशी जुयाः दाऊदया शहरय् हल।

13 परमप्रभुया सनू क्वबिपिं खुपलाः न्ह्यःने वने धुंकाः वं छम्ह द्रुहं व छम्ह तसकं ल्हंम्ह साचा बलि बिल।

14 दाऊदं सूती कापःयागु एपोद फिनाः परमप्रभुया न्ह्यःने थःगु बलं फतले प्याखं हल।

15 थुकथं दाऊद व फुक्क इस्राएलीतय्सं ततःसलं हालाः व तुरही पुयाः परमप्रभुया सनू ज्वनावल।

16 परमप्रभुया सनू दाऊदया शहरय् थ्यनाः शाऊलया म्हाय् मीकलं इयालं खंकल। दाऊद जुजुयात परमप्रभुया न्ह्यःने तितिन्ह्याः प्याखं हुलाच्चंगु खन, वं मनं मनं दाऊदयात घच्चाय् कथं स्वल।

† 6:8 दः८ फारेस-उज्जाह थुकिया अर्थ उज्जाहया सजाँय

17 इसिसं परमप्रभुया सनूयात पाल ग्वयाः थःथाय् दुने यंकाः पक्का यानातःगु थासय् तये यंकल। अले दाऊदं परमप्रभुया न्ह्यःने होमबलि व मेलबलि छाल।

18 दाऊदं थुपि बलित छायेधुंकाः वं दक्व शक्ति दुम्ह परमप्रभुया नामं मनूतयत् सुवाः बिल।

19 अले फुक्क मनूतयत् वा इस्राएलीतय् फुक्क पुचःया मिजं व मिसातयत् छपा छपा मरि, छगः छगः छोहरा व किसमिसया छगू छगू ज्वाँय् बिल। अनंलि फुक्क मनूत थथःगु छँ वन।

20 दाऊदं थः परिवारयात सुवाः बीत वःबलय् शाऊलया म्हाय् मीकल वयात नापलायेत पिहां वयाः थथे धाल, “थौं इस्राएलया जुजुया निति गज्याःगु गौरवया दि! व थः दासीतय्गु न्ह्यःने पचिनांगा जुयाः वँय् थें जुल।”

21 दाऊदं मीकलयात थथे लिसः बिल, “छिमि अबु व वया घरानाया सुयागुं पलेसा जितः वय्कःया प्रजा इस्राएलया जुजु ल्ययादीम्ह परमप्रभुया न्ह्यःने थथे यानागु खः। परमप्रभुया न्ह्यःने जिं लसतां हने।

22 जि थ्व स्वयाः क्वह्नांम्ह जुये, थःगु मिखाय् नं चिधं जुये, तर छं जितः धाःपिं दासीतय्सं थुनिया निति जितः इज्जत याइ।”

23 उकिं शाऊलया म्हाय् मीकलया सीबलय् तक नं काय्म्हाय् मदु।

7

दाऊदयात परमप्रभुया बचं

१ इति १७:१-१७

1 दाऊदं थःगु लाय्कू रक्षा याये धुंकाः व वया प्यखें च्वंपिं शत्रुतपाखें परमप्रभुं वयात आराम बियादी धुंकाः☆

2 दाऊदं नातान अगमवक्तायात धाल, “थन जि देवदारु सिं दय्कूगु लाय्कुलिइ च्वनाच्च्वनागु दु, परमप्रभुया बाचाया सनू धाःसा पालय् दु।”

3 नातानं दाऊदयात धाल, “छिगु मनय् छु दु व यानादिसँ। छायाःसा परमेश्वर छिलिसे दी।”

4 उखुन्हु चान्हय् परमेश्वरया वचन नातानयाथाय् वल,

5 “आः वनाः जिम्ह दास दाऊदयात थथे धा, ‘परमप्रभुं थथे धयादी, जि च्वनेत जिगु लागि परमप्रभुया देगः छं हे दय्केगु ला?

6 जिं इस्राएलीतयत् मिश्र देशं पित हयागु दिनंनिसें थौं तक जिं गुबलें देगल्य् च्वनागु मदु। जिं न्ह्याबलें पालय् च्वनागु दु अले छथासं मेगु थासय् वयेगु वनेगु यानाच्वना।

7 गन जिं फुक्क इस्राएलनापं वयेगु वनेगु याना: छु जिं जिगु लागि देवदारु सिँया देग: छाया म्दय्कागु धका: जिमि प्रजा इस्राएलया जवा: जुइत जिं आज्ञा बियापिं सुं नाय:यात न्यना ला?’ ”

8 “उकिं आ: वना: जिम्ह दास दाऊदयात थथे धा, ‘दक्व शक्ति दुम्ह परमप्रभुं थथे धयादी, जिं छन्त ख्यलय् फैच्वलय् ज्वयेगु ज्यां लिक्का: इस्राएलया जिमि मनूतय् शासक दय्का।

9 छ गन वन, जिं छनापं च्वना, अले जिं छिमि फुक्क शत्रुतयत् छंगु न्ह्या:नेनं चीकाबिया। आ: जिं छन्त पृथ्वीयापि नांजा:पिं मनूत मध्ये छम्ह दय्काबी।’ ”

10-11 “जिं जिमि मनूत इस्राएलया नितिं छगूथाय् ल्यये।

जिं अन हे इमित तये अले इपिं थ:गु हे देशय् च्वनी।

अले जिं थ: प्रजा इस्राएलया नितिं न्यायकर्तात धाइपिं

नाय:त ल्ययागु इलंनिसें थुखे इमिसं न्हापा दु:ख ब्यू थें

दुष्ट मनूतय्सं इमित हाकनं गुबलें दु:ख बी मखुत।

जिं छिमि सकल शत्रुतयत् नं नाश यानाबी।”

“ जिं परमप्रभुं छंगु नितिं छगू वंश दय्काबी धका: जिं छन्त धाये।

12 छ सिना: छन्त थ: पुर्खातनापं थुने धुंका: जिं छिमि छम्ह काय्यात जुजु दय्के, अले जिं वयागु राज्ययात बल्लाकाबी।✧

13 जिगु लागि देग: दय्कीम्ह व हे जुइ, अले जिं वयागु सिंहासन न्ह्याबलेंया लागि पलिस्था याये।

14-15 जिं वया बौ जुइ अले व जिम्ह काय् जुइ। वं अधर्म यात धा:सा कथिं वयात जिं सजॉय बी अले मनूत छ्यला: वयात कोर्पा दये तर जिं छ स्वया: न्हापा शासन याइम्ह शाऊलपाखें लित कयागु थें जिं वपाखें धा:सा जिगु सदां दयाच्वनीगु दयामाया गुबलें लित काये मखु।✧

16 छंगु घराना न्ह्याबलें दयाच्वनी अले छिमि सन्तानतय्सं जुजु जुया: न्ह्याबलें शासन याइ। अले छंगु सिंहासन न्ह्याबलें दयाच्वनी।’ ”✧

✧ 7:12 ७:१२ भज ७:३-४; १३२:११; यूह ७:४२; प्रे २:३०

कोर ६:१८; हिब १:५

✧ 7:16 ७:१६ भज ७:३६-३७

✧ 7:14-15 ७:१४-१५ भज ७:२६-२७; २

17 परमेश्वरं दर्शनय् वयात धयादीगु फुक्क खँ नातानं दाऊदयात कन।

दाऊदं परमप्रभुयात सुभाय् ब्यूगु

१ इति १७:१६-२७

18 अले जुजु दाऊद दुहां वना: परमप्रभुया न्ह्यःने च्वन, अले वं थथे प्रार्थना यात,
“हे परमप्रभु परमेश्वर, छिं जितः थन तक हयादीत जि सु खः धका: अले जिगु परिवार छु खः धका:?”

19 हे परमप्रभु परमेश्वर, थ्व छिगु मिखाय् चिधंगु खँ जुल, छायाधा:सा छिं थःदासया घरानाया लिपा वइगु ईया बारे धयादिल। हे परमप्रभु परमेश्वर, छिं जितः छिम्ह तःधंम्ह मनू भाःपियादीगु दु।

20 “थः दासयात ब्यूगु इज्जतया बारे दाऊदं छितः मेगु छु धाये फइ धका:?” हे परमप्रभु परमेश्वर, छिं थः दासयात बांलाक म्हस्यु।

21 थःगु वचनया कारणं अले थःगु इच्छा कथं छिं छिम्ह दासयात सीके बियादीत थ्व तःधंगु ज्या यानादीगु दु।

22 “हे परमप्रभु परमेश्वर, छिं थें मेपिं सुं नं मदु, अले जिमिसं थःगु हे न्हाय्पनं न्यनागु थें छिं बाहेक मेम्ह परमेश्वर मदु।

23 अले छिगु जाति इस्राएल थें ज्याःगु जाति मेगु छु जाति दु धका:?” थः हे मू पुलाः त्वःतकेत झाःगु पृथ्वीइ मेगु छुं जाति दु ला? छिं मिश्रं थः मनूतय्त मू पुलाः त्वःतकाः थःगु नां तःधंकादिल, छिं अजू चायापुगु ज्या क्यनादिल अले छिं थःमनूतयगु लैय् दंपिं जाति जातियात व इमि घःतय्त ख्याना छवयादिल।

24 छिं थः प्रजा इस्राएलयात न्ह्याबलेंया लागि थःगु दय्कादीगु दु। अले छिं हे परमप्रभु, इमि जुयादीगु दु।

25 “आः हे परमप्रभु परमेश्वर, थः दास व जिगु घरानायात छिं छु बचं बियादीगु खः व न्ह्याबलेंया लागि थापं ज्याच्चनेमा। छिं बचं बियादीगु थें यानादिसें।

26 अले व थापं जुइमा व छिगु नां न्ह्याबलेंया लागि तःधनेमा। अले मनूतय्सं थथे धाइ, ‘दक्व शक्ति दुम्ह परमप्रभु इस्राएलयाम्ह खः।’ अले छिं थः दास दाऊदया घरानायात छिगु न्ह्यःने सदां तयातयेमा।

27 “हे दक्व शक्ति दुम्ह परमप्रभु, इस्राएलया परमेश्वर, छिम्ह दासं छिगु न्ह्यःने थ्व प्रार्थना यायेगु आँट यानागु दु छायाधा:सा छिं थुपिं फुक्क खँ जि छिम्ह दासयात क्यनादिल अले जिमि सन्तानयात जुजु दय्के धकाः जितः धयादिल।

28 अले आः, हे परमप्रभु परमेश्वर, छि हे खः, छिगु वचन विश्वास यायेबहः जू अले छिं थः दासयात थ्व भिंगु बचं बियादीगु दु,

29 अथे जुयाः, आः छिं थः दासया घरानायात लयतायाः आशिष बियादिस्, थ्व न्हाबलें छिगु न्हाःने दयाचवनेमा। छायाःसा हे परमप्रभु परमेश्वर, छिं हे थथे धयादीगु दु। छिगु सुवालं हे छिकपिनि दासया परिवारयात न्हाबलें सुवाः दयाचवनी।”

8

लडाईलय् जुजु दाऊद त्याःगु

१ इति १८:१-१७

1 जुजु दाऊदं पलिशतीतयत्त हमला यानाः त्याकुबलय् वं मेथेग-आमाहय्* अधिकार यात।

2 दाऊदं मोआबीतयत्त नं बुकल, अले इमित बैय् घंकेबिल। अले इमित छपु खिपतं नापय् यात। स्यायेत खिपतं निक्वः नापय् यात, मस्यासे म्वाकातयेत खिपतं स्वक्वः नापय् यात। थुकथं मोआबीत वयागु अधीनय् च्वनाः कर पुलिपिं जुल।

3 हाकनं यफ्रेटिस खुसिया लिक्क च्वंगु लागा त्याका कायेत वनाच्वंम्ह सोबाया जुजु, रहोबया काय् हददेजेरयात दाऊदं हमातया लिक्क बुकल।

4 दाऊदं दुःछि गः रथ व न्हयदुःम्ह रथ चले याइपिं व निइदुःम्ह न्यासि जुइपिं सिपाईतयत्त कब्जा यात। दाऊदं सछिम्ह सल बाहेक हददेजेरया रथ सालिपिं दक्व सलतयत्त खुत्यां यानाबिल।

5 सोबायाम्ह जुजु हददेजेरयात ग्वाहालि यायेत दमस्कस शहरं अरामीत वल। तर दाऊदं इमि निइनिदुः सिपाईतयत्त स्यानाबिल।

6 अले दाऊदं अरामया दमस्कस शहरय् प्यखें छाउनीत तल। अरामीतयसं दाऊदया अधीनय् च्वनाः वयात कर पुल। थुकथं दाऊद न्हाथाय् वंसां परमप्रभुं वयात त्याकादिल।

7 दाऊदं हददेजेरया कप्तानतयगु लुँया ढाल कब्जा यानाः यरूशलेमय् हल।

8 वं हददेजेरया शहरत तेबह व बरोतैनं यक्व हे कैय् हल।

9 हमातयाम्ह जुजु तोऊनं सोबायाम्ह जुजु हददेजेरया फुक्क सेनायात दाऊदं बुकूगु खँ न्यन।

* 8:1 ८:१ मेथेग-आमाह थ्व पलिशतीतयगु शहर गाद जुइफु

10 उकिं वं थःकाय् योरामयात दाऊद जुजुयाथाय् हददेजेरयात बुकूगुलि ज्वजलपा यायेत व बधाई बीत छवल। तोऊ हददेजेर नापं तःक्वः हे लडाईं याये धुंकूगु खः। अले योरामं लुँ, वहः व कँय्यागु थीथी कथंयागु सामानत ज्वनाः वल।

11-12 जुजु दाऊदं उपिं थलबल परमप्रभुयात देछाल। थःमहं त्याकाःगु फुक्क देशत एदोमी, मोआबी, अम्मोनी, पलिश्ती व अमालेकीतपाखें काःगु लुँ व वहः नं देछाल। सोबाया जुजु रहोबया काय् हददेजेरपाखें लाकाहःगु सामान नं देछाल।

13 हाकनं दाऊदं चियागु ब्यासिइ झिंच्याद्मह एदोमीतय्त स्यानाः तःधंगु नां तल।

14 व अनं लिहां वःबलय् एदोमय् सिपाईतय् छाउनीत तल, अले सकल एदोमीत दाऊदया अधीनय् च्वन। दाऊद न्ह्याथाय् वंसां परमप्रभुं वयात त्याकादिल।

दाऊदया अधिकारीत

15 दाऊदं इस्त्राएल न्यंक शासन यात। वं फुक्कसिगु लागि खःकथं व न्यायकथं ज्या यात।

16 सरस्याहया काय् योआब सेनापति खः, अहीलूदया काय् यहोशापात देशय् जूगु घटना च्वयातइम्ह खः।

17 अहीतूबया काय् सादोक व अबियाथारया काय् अहीमेलेक पुजाहारीत खः। सरायाह छ्यान्जे खः।

18 यहोयादाया काय् बनायाह करेती व पेलेथीतय् कप्तान खः। अले दाऊदया कायपिं जुजुया ततःधंपिं अधिकारी खः।

9

दाऊद व मपीबोशेत

1 दाऊदं न्यन, “छु शाऊलया घरानाय् बचय् जूम्ह सुं दु ला, वयात जिं जोनाथनया कारणं माया याये फइ ला?”

2 शाऊलया घरानाय् सीबा नांयाम्ह छम्ह च्यः दु। वयात दाऊदं सःतेके छवल। जुजुं वयात न्यन, “छु छ सीबा खः ला?” वं लिसः बिल, “खः, जि छिकपिनि दास सीबा हे खः।”

3 अनंलि जुजुं वयात धाल, “छु शाऊलया घरानाय् बचय् जूम्ह सुं दु ला, गुम्हय्सित जिं परमेश्वरया सदां विश्वास याये बहःगु दयामाया क्यने फइ ला?”

सीबां धाल, “स्वयादिस्मै, जोनाथनया छम्ह काय् म्वाःगु दु। बरु व निपा तुति खुत्याम्ह खः।”

4 जुजुं न्यन, “व गन दु?”

अले सीबां लिस: बिल, “व लो-देबारय् अम्मीएलया काय् माकीरया छैय् दु।”

5 अले जुजुं मनूत छवया: वयात लो-देबारं अम्मीएलया काय् माकीरया छैय् स:तके छवल।

6 जोनाथनया काय्, शाऊलया छय् मपीबोशेत दाऊदयाथाय् वल। अले वं क्वछुना: जुजुयात भागि यात।

दाऊदं वयात धाल, “मपीबोशेत!”

वं लिस: बिल, “धयादिसैं, जि छिकपिनि दास थन हे दु।”

7 दाऊदं धाल, “ग्याये मते। जिं छन्त छिमि अबु जोनाथनया कारणं दया याये। जिं छिमि बाज्या शाऊलया जग्गा छन्त लितबी। अले छ जिनापं न्ह्याबलैं हे टेबिलय् च्वना: नयेगु जुइ।”

8 मपीबोशेतं हाकनं क्वछुना: भागियाना: धाल, “जि सु ख: धका:, छपिन्सं जि छम्ह सी धुकूम्ह खिचायात वास्ता यनादीयागु?”

9 अनंलि दाऊदं शाऊलया च्य: सीबायात स:तके छवया: वयात थथे आज्ञा बिल, “छिमि मालिकया छय्यात जिं शाऊल व वया घरानाया फुकक सम्पत्ति बियागु दु।

10 छ, छिमि काय्पि व च्य:तय्सं वयागु जग्गाय् बुँज्या याना: उकिं व:गु अन्न छं छिमि मालिकया परिवारयात बीमा:। अले मपीबोशेत, छिमि मालिकया छय् नं न्ह्याबलैं जिगु टेबिलय् च्वना: नयेगु याइ।” (सीबाया झिंन्याम्ह काय् व निइम्ह च्य:त दु।)

11 अनंलि सीबां जुजुयात धाल, “जिमि प्रभु महाराजं थ: च्य:यात आज्ञा बियादी थें जि छिकपिनि च्य:नं फुकक याये।” अथे जुया: जुजुया काय्पिन्सं थें मपीबोशेत नं दाऊदया टेबिलय् च्वना: नयेगु यात।

12 मपीबोशेतया मीका नांयाम्ह छम्ह चिधिंक:म्ह काय् दु। सीबाया परिवारया फुककं मपीबोशेतया च्य: जुल।

13 अले मपीबोशेत यरुशलेमय् हे च्वनाच्वन, छायाध:सा न्ह्याबलैं व जुजुया टेबिलय् च्वना: जुजुनापं तुं नयेगु याइ। व निपा तुति खुत्यांम्ह ख:

10

दाऊदं अम्मोनीत व अरामीतय् त्वाकूगु

१ इति १९:१-१९

1 छुं ई लिपा अम्मोनयाम्ह जुजु नहाश सित, अले वया काय् हानून जुजु जुल।

2 दाऊद जुजुं धाल, “जिं हानूनयात हनाबना यायेमा: छायाधा:सा वया बौ नाहाशं जित: न्ह्याबलें हनाबना या:गु ख:।” उकिं वं बिचा: हना: दूततयूत खबर बिया: छवल।

तर दाऊदया दूतत अम्मोनय् थ्यंबलय्

3 अम्मोनी नाय:तय्सं थ: मालिक हानूनयात धाल, “छिं स्वयादीबलय् दाऊदं छिमि बा:यात इज्जत याना: बिचा: हनेत थुपि मनूत छवयाह:गु धका: च्वनादिया ला? अथे ख: हे मखु। वं ला झीगु देश त्याकाकायेगु लागिं चिवा कायेत इमित छवयाह:गु ख:।”

4 उकिं हानूनं दाऊदया मनूतयूत ज्वना: इमिगु बच्छि बच्छि दाही खानाबिल। अले इमिगु वस: दथुइ जें तक हे चानाबिया: इमित लितछवल।

5 इपिं छेंय् लिहां वयेत तसकं मछाल। छुं मनूतय्सं वना: दाऊदयात व खें कनाबिल, अले दाऊदं इमित दाही ताहा मजुतले यरीहो शहरय् च्वनाच्चें अले लिहां वा धका: खबर छवल।

6 आ: जिपिं दाऊदया निंतिं मिखां स्वये मय:पिं मनूत जुइ धुंकल धका: अम्मोनीतय्सं सिल। उकिं इमिसं बेथ-रहोब व सोबा शहरं निइद्रु: न्यासि वनीपिं अरामी सिपाइंत थ:पिन्त ग्वाहालिया निंतिं बालं कया: हल। इमिसं माकाया जुजुनापं वया सेनात द्रु:छि व तोबपाखें झिनिद्रु: मनूत बालं कयाहल।

7 दाऊदं व खें न्यना: योआब व थ: सिपाइंतयूत इपिं लिसे लडाइँ यायेत छवल।

8 अम्मोनीत वया: शहरया मू ध्वाखाया न्ह्य:ने लडाइँ यायेत तयार जुयाच्चन। अले सोबा व रहोबाया अरामी व तोब व माकाया मनूत चक्कंगु ख्यलय् लडाइँया निंतिं थथ:गु थाय् काल।

9 योआबं थ:गु न्ह्य:ने व ल्युने लडाइँया लागिं शत्रुया सिपाइंत तयार जुयाच्चंगु खना: वं इस्त्राएलयापिं ल्ययात:पिं सिपाइंतयू पुच:यात अरामीतयू चुलिचू तल।

10 मेपिं सिपाइंतयूत वं थ:किजा अबीशैया अधीनय् तल, अले वं इमित अम्मोनीत लिसे ल्वायेत चुलिचू इव:लाक तल।

11 योआबं अबीशैयात धाल, “अरामीतय्सं जित: बुकाच्चंगु खन धा:सा छ वया: जित: ग्वाहालि न्यु, अम्मोनीतय्सं छन्त बुकाच्चंगु खन धा:सा जि वया: छन्त ग्वाहालि बी।

12 बल्ला व साहसी जु! अले थ:गु जाति व झी परमेश्वरया शहरतयगु निंतिं मग्यासें लडाइँ यायेनु। अले परमप्रभुयात छु याये य: वय्क्लं व हे यानादी।”

13 अले योआब व वया सिपाइंतयूसं अरामीतयूत हमला यात। अरामीत योआबया न्ह्य:नं बिस्चुं वन।

14 अले अरामीत बिस्युं वनाच्चंगु खनाः अम्मोनीत अबीशैया न्ह्यःनं बिस्युं वनाः शहर दुने दुहां वन। अनंलि योआब अम्मोनीतलिसें लडाईं यायेगु त्वःताः यस्शलेमय् लिहां वल।

15-16 इस्राएलीतलिसें थःपि बुइ धुंकूगु खँ सियाः अरामीतय्सं हाकनं थः सिपाईतय्त मुंकल। अले जुजु हददेजेरं यूफ्रेटिस खुसिया पुर्बय् दुपि मेपि अरामी सिपाईतय्त सःतके छवल। अले हददेजेरया सेनापति शोबाक न्हेलुवाः जुयाः हेलामय् न्ह्यज्यात।

17 व खँ न्यनाः दाऊदं सकल इस्राएली सिपाईतय्त मुंकल। दाऊदं इमित यर्दन खुसि उखे हेलामपाखे यंकल। वं इस्राएलीतय्त अरामीतय् न्ह्यःने थन। अले इमिसं वनापं लडाईं यात।

18 तर अरामीत इस्राएलीतपाखें बिस्युं वन। अले दाऊदं इमि न्हयसःम्ह रथ चलय् याइपि व पिइद्रःम्ह सिपाईतय्त स्यानाबिल। अन वं अरामी सेनापति शोबाकयात नं घाःपा यानाबिल अले व अन हे सित।

19 हददेजेरया अधीनय् च्वंपि फुक्क जुजुपिन्सं जिमित इस्राएलं त्याकल धकाः सियाः इस्राएललिसें सन्धि यात अले वयागु अधीनय् च्वन। अनंलि अरामीतय्सं हाकनं अम्मोनीतय्त ग्वाहालि बीगु इच्छा मयात।

11

दाऊद व बतशेबा

1 बसन्तया इलय् जुजुपि लडाईं यायेत पिहां वनेगु इलय् दाऊदं योआब व थः मेपि कप्तानत व फुक्क इस्राएली सिपाईतय्त लडाईं यायेत छवल। इमिसं अम्मोनीतय्त नाश यानाबिल, अले रब्बा शहरयात घेरय् यात। दाऊद धाःसा यस्शलेमय् हे च्वन।

2 छन्हु बहनी दाऊद खातां दना वनाः दरबारया कःसि चाःहिला च्वंबलय् छम्ह तसकं हिंसि दुम्ह मिसा म्वःल्हुया च्वंगु खन। व तसकं बांलाःम्ह खः।

3 अथे जुयाः दाऊदं व सु खः धकाः न्यनेकने यायेत छम्ह मनू छवल। वं थथे खबर हल, “व एलीआमया म्हाय् हिंती उरियाहया कलाः बतशेबा खः।”

4 अले दाऊदं मनूत छवयाः बतशेबायात थःथाय् काय्के छवल। व दरबारय् वल अले दाऊद वनापं घन। (बतशेबा दाऊदयाथाय् वःबलय् वं नकतिनि थः थीमत्यः जुइ धुंकाः थःत शुद्ध याःगु खः।) अनं लिपा व थःगु हे छँ लिहां वन।

5 अले वया प्वाथय् दत। बतशेबां, “जि प्वाथय् दत” धकाः दाऊदयाथाय् खबर छवल।

6 अथे जुयाः दाऊदं “हिती उरियाहयात थःथाय् छवया हजि” धकाः योआबयात उजं बिल। अले योआबं वयात दाऊदयाथाय् छवयाहल।

7 उरियाह दाऊदयाथाय् थयंबलय् दाऊदं वयात न्यन, “योआब व वया पुचःतयग्गु अले लडाईया बारे गथे जुयाच्वंगु दु?”

8 अनंलि दाऊदं उरियाहयात धाल, “छं छैं वनाः थःगु तुति सिलाछव।” व दरबारं पिहां वंबलय् जुजुं वयात कोसेलि बियाछत।

9 तर उरियाह थःगु छैं मवं, व जुजुया ध्वाखा पिवाःत नापं ध्वाखा लिक्क घन।

10 उरियाह थःगु छैं लिहां वंगु मदु धकाः दाऊदं न्यनेवं वयात धाल, “छु छ तापाकं वयाम्ह, मखु ला? छ छाय् थःगु छैं मवनागु?”

11 उरियाहं लिसः बिल, “इम्राएल, यहदा व सनू पालय् हे दु अले जिमि सेनापति योआब व छःपि जिमि प्रभुया मनूत नं चकंगु ख्यलय् पाल ग्वयाच्वंगु दु। जि जक नयेत्वने यायेत व कलाःनापं घनेत छैं वनेगु ला? जिं छःपिनिगु जीवनया नामं पाफ्याः धाये, जिं अथे याये फइ मखु।”

12 अले दाऊदं उरियाहयात धाल, “अथे खःसा छ छन्हु नि थन च्वँ अले कन्हय् जिं छन्त वनेबी।” अथे जुयाः उरियाह उखुन्हु व कन्हय् खुन्हु यरूशलेमय् हे च्वन।

13 दाऊदं वयात नयेत्वने यायेत सःतल, अले वयात यक्व त्वंकल। बहनी व पिहां वन जुजुतय् पिवाः च्वनिपि नापं थःगु लासाय् घनाः चा छ्यात। उखुन्हु व थःगु छैं नं मवं।

14 कन्हय् खुन्हु सुथय् दाऊदं योआबयात छगू पौ च्वयाः उरियाहया ल्हातय् बियाः छवल।

15 दाऊदं पौलय् थथे धकाः च्वल, “गन तच्चकं लडाईं जुयाच्वंगु दु अन उरियाहयात न्ह्यःने छवयाः छिपि लिच्यु अले व घाःपा जुयाः सीमा।”

16 अथे जुयाः योआबं रब्बा शहरयात घेरय् याःबलय् वं उरियाहयात शत्रुतय् छुं बहादुर सिपाईत दुथाय् सीकाः अन छवयाबिल।

17 शहरया मनूत छक्कलं वयाः योआब नापं लडाईं यात अले दाऊदया छुं सिपाईतय्त स्यानाबिल नापं हिती उरियाहयात नं स्यात।

18 अनंलि योआबं छम्ह मनूयात दाऊदयाथाय् लडाईया बारे फुक्क खबर बियाः छवत।

19 व खबर ज्वनावंमह मनूयात योआबं थथे धाल, “छं लडाईया बारे जगू फुक्क खँ जुजुयात धाये धुंकाः

20 जुजु तंम्वया: ‘लडाइँ या:वनाबलय् छिपिं छाया् लिक्क वनागु? प:खालं वाणं कय्काहइ धका: छिमिसं सीमा:गु ख:।

21 यस्बबेसेतया* काय् अबीमेलिकयात सुनां स्या:गु ख: ? इमिसं वयात छम्ह मिसां ल्वहंघ: पखालं क्वफानाहया: स्या:गु मखु ला? अले व तेबेसय् सीगु मखु ला? छिपिं प:खा:या थुलिमछि लिक्क छाया् वनागु?’ थथे धका: न्यन धा:सा वय्क:यात थथे धा, ‘छसपोलया दास हिन्ती उरियाह नं सित।’ ”

22 व खबर यंकम्ह मनू वन अले व दाऊदयाथाय् थयंबलय् योआबं धयाह:थें वयात फुक्क खबर बिल।

23 वं दाऊदयात धाल, “शत्रुत शहरं पिहां वया: जिमित क्वत्यला: जिमिगु विरोधय् चकंगु ख्यलय् मुन। तर जिमिसं इमित शहरया मू ध्वाखा तक हे लिनायंका।

24 अन पखालय् च्वना: वाणं कय्कीपिन्सं जुजुया छुं दासतय् वाणं कय्का: स्यात। छपिनि दास हिन्ती उरियाहयात नं स्यानाबिल।”

25 दाऊदं खबर ह:म्ह मनूयात धाल, “योआबयात थ्व खबर यंकाब्यु, ‘छ दिक्क चाये मते। गथे तरवारं छम्हयसित स्याइ अथे हे मेम्हयसित नं स्याइ। शहरयात हमला यायेगु त्व:ते मते अले उकियात तहसनहस या।’ योआबयात हपा: दयेमा धका: थ्व खँ वयात धयाब्यु।”

26 उरियाहया कलातं थ: भा:त सित धयागु खबर न्यंबलय् वं वयागु निति दुखं च्वन।

27 दुखं च्वनीगु ई पूवने धुंका: दाऊदं मनूत छवया: बतशेबायात थ:गु छँय् हल। अनंलि व दाऊदया कला: जुल, वं छम्ह काय् बुइकल। तर दाऊदं छु या:गु ख: व खना: परमप्रभु लय्मता:।

12

नातानया न्वचु व दाऊदया पश्चाताप

1 परमप्रभुं नातान अगमवक्तायात दाऊदयाथाय् छवयादिल, अले व दाऊदया न्हा:ने वना: थथे धाल, “छगू शहरय् निम्ह मनूत दु, छम्ह त:मिम्ह मेम्ह चीमिमह।

2 त:मिम्ह मनूया यक्व फैचल्यया बथां व सा द्रुहंया बथां दु।

3 तर चीमिमह मनूया चिधिंक:म्ह फैचा बाहेक छुं नं मदु। वं थ:म्हं हे वयात नकेत्वंके याना: थ:गु हे छँ थ: काय्मह्वाय्पि नापं तुं ब्वलंकल। वं वयागु हे भुइ नइगु

* 11:21 ११:२१ यस्बबेसेत वयागु मेगु नां यस्बाबेल वा गिदोन ख:

अले वयागु हे ख्वल्चाय् त्वनीगु अले वयागु हे मुलय् घनिगु। वं वयात थःम्ह्याय्यात थें याइगु खः।

4 छन्हू छम्ह परदेशी व तःमिम्ह मनूया छैय् वल, अले व तःमिम्ह मनूयात पाहांयात थें थःगु सा द्रुहं व फैच्वलय्या बथानं छुं बीगु मतिइ मतल। तर व चीमिम्ह मनूया चिधिकःम्ह फैचा कयाः पाहांया निति भव्य ज्वरय् यात।”

5 दाऊद व मनू खनाः तसकं तंम्वल, अले वं नातानयात धाल, “धातर्थे परमप्रभु म्वाःम्ह खः थें, थुकथं ज्या याःम्ह मनू मृत्युया योग्य जू!

6 वं दयामाया मयासें थज्याःगु ज्या याःगु व चिधिकःम्ह फैचाया पलेसा प्यदुगं पुलेमाः।”

7 अनंलि नातानं दाऊदयात धाल, “व मनू ला छि हे खः! परमप्रभु इस्राएलया परमेश्वरं धयादी, ‘जिं छन्त इस्राएलीतय् जुजु अभिषेक याना। जिं छन्त शाऊलया ल्हातं बचय् याना।

8 जिं छिमि मालिकया छें व वया कलाःत छंगु हे निति बिया। जिं छन्त इस्राएलया घराना व यहदाया घराना बिया। उलि नं मगाःगु जूसा जिं छन्त मेगु यक्व हे बीगु खः।

9 तर छं परमप्रभुया मिखाय् छु मभिं व हे यात। छाय् परमप्रभुया वचनयात क्वह्यंकूगु? छं हिती उरियाहायात तरवारं स्याकल। अले छं वया कलाःयात थःम्ह कलाः यायेत यंकल। छं उम्ह मनूयात अम्मोनीतयगु तरवारं स्याकेबिल।

10 छं जितः क्वह्यंकूगुलि व हिती उरियाहाया कलाःयात छं थः कलाः यायेत यंकूगुलि छिमि परिवारं गुबलय् नं तरवारपाखें आराम कायेखनि मखु।”

11 “परमप्रभुं धयादी, ‘जिं छंगु थःगु हे परिवारया दथुं छन्थाय् विपत्ति हये। जिं छिमि कलाःतयत यंकाः छंगु हे मिखां खंक छं लिक्क लाःम्ह मनूयात बी अले न्हिनय् हे व उपि नापं घनी।

12 छं छु यात व सुं मदुगु थासय् यात तर जिं थ्व फुक्क इस्राएलं खंक न्हिनय् जःलय् हे याये।”

13 अनंलि दाऊदं नातानयात धाल, “जिं परमप्रभुया विरोधय् पाप यानागु दु।”

नातानं लिसः बिल, “परमप्रभुं छिगु पाप यंकादीगु दु अथे जुयाः छि सी मखु।

14 तर थ्व ज्या यानाः छिं परमप्रभुया शत्रुतयत् हेस्यायेगु मौका ब्यूगु दु, अथे जुयाः छिपाखें दुम्ह काय् सी।”

15 नातान थःगु छें लिहां वने धुंकाः उरियाहाया कलाःपाखें दुम्ह दाऊदया काय्यात परमप्रभुं कय्कल अले व म्हं मफुत।

16 दाऊदं व मचाया निंति परमप्रभुयाके बिन्ति यात। व अपसं च्वन। अले थःगु छैय् दुहां वनाः बैय् भ्वसुलाः चा छ्यात।

17 छैय् दुपि हाकिमतयसं वयात थनेगु कुतः यात तर वं म्हाः धाल, अले इपि नापं छुं नयेगु मन नं मयात।

18 न्हयन्हु दुखुन्हु मचा सित। दाऊदया च्यःतयसं वयात मचा सीगु खँ कने ग्यात। इमिसं धाल, “मचा मसीनिबलय् जिमिसं वयात धयाः अयनं वं जिमिगु खँ हे मन्यं। आः झीसं वय्कःयात गुकथं मचा सीगु खँ धायेगु? वय्कलं थःत छुं हानि यानादी ला?”

19 तर दाऊदं थः च्यःत सल्लाह यानाच्चंगु खन अले मचा सी धुंकल धकाः सिल। अथे जुयाः वं न्यन, “मचा सित ला की छु?”

अले इमिसं लिसः बिल, “खः, व सित।”

20 अनंलि दाऊदं दनावनाः म्वःल्हुयाः म्हय् चिकं बुयाः लं फित। अले वं परमप्रभुया नापलायेगु पालय् वनाः आराधना यात। अनंलि व थःगु छै वन, अले वं नयेगु नसा हयेत आज्ञा बिल, नसा तयार जुइ धुंकाः वं नल।

21 वया च्यःतयसं वयात न्यन, “थ्व छु खः? मचा म्वानाच्चंबलय् छि अपसं व दुखं च्वनादिल। तर आः व सित अले छि दनावनाः नसा नयेत झाल।”

22 वं लिसः बिल, “मचा म्वानाच्चवंतले परमप्रभुं जितः दया यानादी अले मचा म्वाइ धकाः जिं मतिइ तथाः ख्वयाः अपसं च्वना।

23 तर आः व सी धुंकल धाःसा जि छाया अपसं च्वनेगु? छु जिं वयागु प्राण हाकनं लिफ्यानाहये फइ ला? व गन दु जि वयाथाय् वनीगु जुइ तर व जिथाय् वये फइ मखु।”

24 अनंलि दाऊदं थः कलाः बतशेबायात सान्त्वना बिल। दाऊद वयाथाय् वन, अले वनापं घन, अले वं छम्ह काय् बुइकल। वयागु नां सोलोमन तल। परमप्रभुं वयात माया यानादिल।

25 परमप्रभुं वयात माया यानादीगुलि वयागु नां यददीयाह* ति धकाः नातान अगमवत्तापाखें वय्कलं दाऊदयाथाय् खबर छवल।

26 थुबलय् हे योआबं अम्मोनीतय्गु शहर रब्बायात हमला यानाः जुजुया किल्ला त्याका काल।

27 योआबं थथे खबर बियाः दूतत दाऊदयाथाय् छवल, “जिं रब्बायात हमला यानाः अनयागु लः बुयावइगु थाय् त्याकाकाये धुन।

* 12:25 १२:२५ यददीयाह थुकिया अर्थ परमप्रभुया यःम्ह

28 छिगु ल्यंदुपि सिपाईत छथाय् मुंका: थःम्हं हे शहरयात घेरय् याना: त्याका का। मखुसा जिं हे व शहरयात त्याकाकाये अले अन जिगु नां न्ह्याबलें दयाचवनी।”

29 अथे जुया: दाऊदं फुक्क सिपाईत छथाय् मुंकल अले रब्बा शहरय् वना: उकियात हमला याना: त्याका काल।

30 दाऊदं इमि जुजुया छेनं लुँयागु श्रीपेच काल। उकियागु तौल स्विन्यागु किलोग्राम दु, उकी रत्नत थुनातःगु दु। दाऊदं उपि रत्नत कया: थःगु श्रीपेचय् तल। हानं वं शहरं यक्व हे सामान त्याकाहल।

31 वं शहरयापि मनूतय्त पिने पितहल अले इमित कःति, नया कू व पा ज्वंका: ज्या याकल। अले अप्पा दयकीगु ज्या याकल। दाऊदं अम्मोनीतय् फुक्क शहरय् थथे हे यात। अनंलि दाऊद व वया सकल मनूत यरुशलेमय् लिहां वल।

13

अमनोन व तामार

1 दाऊदया काय् अब्शालोमया तामार नांयाम्ह छम्ह तसकं बांलाःम्ह केहें दु। दाऊदया मेम्ह काय् अमनोन वयागु मतिनाय् भुलय् जुल।

2 अमनोन थः चिरिमांपाखें दुम्ह केहें तामारयात थुलि यय्कल कि चच्छि न्हिच्छि वयात लुमंका: च्वँच्वं व म्हं हे मफुत। व ब्याहा मज्जुनिम्ह मिसामचा जूगुलि वयात छुं यायेत अमनोनयात थाकु।

3 तर अमनोनया योनादाब नांयाम्ह छम्ह पासा दु। व दाऊदया दाजु शिमाहया* काय् खः।☆ योनादाब तसकं चलाखम्ह खः।

4 वं अमनोनयात धाल, “हे राजकुमार, छि छाय् न्हियान्हिथं थथे निराश जुयादीयागु, छितः छु जुल?”

अनंलि अमनोन वयात धाल, “जिं जिमि किजा अब्शालोमया केहें तामारयात तसकं यय्काःगु दु।”

5 अले योनादाब वयात धाल, “छ म्हंमफु धका: लासाय् घनाच्वँ।” छिमि अबु छन्त स्वःवइबलय् वयात थथे धा, “दया याना: जिमि केहें तामार वया: जितः नयेगु निंति नसा ब्यु वयेमा। वं जिगु न्ह्यःने नसा दय्केमा, अले जिं वयात स्वये, वयागु हे ल्हातं जितः तयाब्यूगु जिं नये।”

* 13:3 १३:३शिमाह थ्व शिमाह व शम्माह छम्ह हे खः ☆ 13:3 १३:३ १ शमू १६:९

6 अथे जुयाः अमनोन म्हंमफुगु पहः यानाः लासाय् घनाच्चन। जुजु वयात स्वयेत वःबलय् वं धाल, “स्वयादिसँ, जिमि केहँ तामार थन वयाः जिगु न्ह्यःने थःगु हे ल्हातं मरि छुनाः जितः नके बियादिसँ।”

7 अथे जुयाः दाऊदं दरबारय् तामारयाथाय् थथे धकाः खबर छवल, “छिमि दाजु अमनोनया छैय् वनाः वयागु निती नसा ज्वरय् याः हूँ।”

8 अले तामार अमनोनयाथाय् वःबलय् व लासाय् घनाच्चंगु खन। वं भचा छुचुं न्हायाः वयागु न्ह्यःने मरि छुल।

9 अले वं भाजंनापं यंकाः अमनोनया न्ह्यःने तयाबिल तर अमनोनं नये मानय् मजू। अमनोनं धाल, “थनं फुक्क पिहां हूँ” अथे जुयाः फुक्कं वयागु कोथां पिहां वन।

10 अनंलि वं तामारयात धाल, “मरि थन जिथाय् लासाय् हे हजि अले छं थःगु हे ल्हातं जितः नकि।” अले तामारं थःम्हं दय्कूगु मरि काल, अले व ज्वनाः अमनोनयाथाय् दुनेया कोथाय् वन।

11 तर तामारं मरि ब्यूबलय् अमनोनं वयागु ल्हाः ज्वनाः थथे धाल, “हे जिमि केहँ, जिनापं घं वा।”

12 तर तामारं लिसः बिल, “मज्यू जिमि दाजु, जिगु बेइज्जत यानादी मते। थज्याःगु ज्या इस्त्राएलय् याये मज्यू। जितः थज्याःगु मभिंगु ज्या यानादी मते।

13 मनूतय्थाय् जिं थःगु ख्वाः गय् यानाः क्यना जुइगु? अले मनूतय् छिं थःगु बारे छु धयादी? फुक्क इस्त्राएलीतय् दथुइ छि मभिंम्ह व मूर्खम्ह जुइ। छिसं जुजुनापं खँ ल्हानादिसँ अले जितः छिनाप ब्याहा यानाबीत वय्कः मानय् जुइ।”

14 तर वं तामारया खँ न्यं हे मन्यन अले व तामार स्वयाः बल्लागुलि वयात बलजफति ज्वनाः बलात्कार यात।

15 अनंलि अमनोनं तामारयात तसकं मय्कल। अमनोनया न्हापायागु मतिना स्वयाः आःयागु मय्कूगु यक्वः अप्वः जुल। अमनोनं तामारयात धाल, “याकनं दनाः पिहां हूँ।”

16 वं लिसः बिल, “म्हाः! जितः ख्यानाः पितिनाछवयेगु तःधंगु मभिंगु ज्या यानादी मते।”

अयनं वयागु खँ न्यं हे मन्यं।

17 अले वं थः च्यःतय् सःताः धाल, “थ्व मिसायात पितिनाछव, अले लुखा तिनाः चुकू तयाब्यु।”

18 च्यःतय्सं वयात पितिनाः लुखा तिनाः चुकू तयाबिल। तामारं ब्याहा मजूनिम्ह राजकुमारीं फीगु पूरा लंजग्वः दुगु लं फिनातःगु खः।

19 तामारं थःगु छैनय् नउ तल अले थःम्हं फिनातःगु लंजग्वः दुगु भान्तां लं खुनाः ल्हातं थःगु ख्वाः त्वःपुयाः ख्वख्वं पिहां वन।

20 वया दाजु अब्शालोमं वयात खुनाः न्यन, “छु अमनोनं छन्त बलात्कार यात ला कि छु? केहें मय्जु, व खँ नुगलय् तथाः दुःख ताय्के मते। व ला छं चिरिमांया काय् खः। थ्व खँ सुयातं धाये मते।” तामार अब्शालोमया छैय् वनाः च्वै वन अले व छम्ह त्वःतातःम्ह मिसा थें याकःचा दुःखी जुयाच्चन।

21 दाऊदं थ्व फुक्क खँ न्यंबलय् व तसकं तंम्बल।

22 अब्शालोमं अमनोनयात भिं व मभिं छुं मधाल। थः केहें तामारयात बेइज्जत याःगुलि अब्शालोमं अमनोनयात तसकं मय्कल।

अब्शालोमं अमनोनयात स्याःगु

23 निदँ लिपा अब्शालोमं एफ्राइम शहरया लिक्क बाल-हासोरय् फैतय्गु ऊन चायेगु नखः हनाच्चंबलय् जुजुया फुक्क काय्पिन्त नं सःतल।

24 अब्शालोमं जुजुयाथाय् वयाः धाल, “स्वयादिसँ, छःपिनि दास फैया ऊन चायेगु नखः हनाच्चंगु दु। छि व छिकपिनि भारदारत नं झायादी ला?”

25 जुजुं लिसेः बिल, “वये मखु, जिमि काय्, जिपि सकलें वयाः छन्त दुःख बी मखु।” अब्शालोमं तसकं कर यात, अय् नं दाऊद वने मानय् मजू। बरु अब्शालोमयात आशिष बियाः बिदा बियाछवत।

26 अले अब्शालोमं धाल, “छि झायादी मखुसा जिमि दाजु अमनोनयात जिनापं वनेबियादिसँ।” जुजुं न्यन, “व छाया छलिसे वनेगु?”

27 तर अब्शालोमं हाकनं जिद्दी यात। अथे जुयाः दाऊदं अमनोन व जुजुया फुक्क काय्पि वनापं हँ धकाः धाल।

28 अब्शालोमं थः मनूतय् थथे उजं बिल, “मौका स्वयाच्च्वै, अले अमनोन त्वनाः धेधे चुइबलय् जिं ‘अमनोनयात स्या!’ धकाः धाये। अले छिमिसं वयात स्या। ग्याये माःगु मदु। साहस यानाः धिसिलाक्क च्वै। थ्व जिगु छिमित आज्ञा खः।”

29 अले अब्शालोमया मनूतय्सं वं धाःथें अमनोनयात स्यात। अनंलि फुक्क जुजुया काय्पि हथाय् चाचां थथःगु खच्चर गयाः छैपाखे वन।

30 इपिं लैय् वनाच्चंबलय् जुजु दाऊदयाथाय् थज्याःगु खबर थ्यन, “अब्शालोमं छिकपिनि फुक्क काय्पिन्त स्याये धुंकल, छम्ह नं बचय् मजू।”

31 दाऊद जुस्क्क दनाः तसकं दुःख मन ताय्काः थःगु वसः खुत अले बैय् भवसू वन। अले वनापं दुपि च्यःतय्सं नं थथःगु वसः खुत।

32 दाऊदया दाजु शिमाहया काय् योनादाबं धाल, “इमिसं छिकपिनि फुक्क काय्पि स्याःगु मदु। अमनोनयात जक स्याःगु खः। अब्शालोमया केहें तामारयात अमनोनं बलात्कार याःगु न्हिनिसें हे वं थथे यायेत स्वयाच्चंगु खः।

33 छिकपिनि फुक्क काय्पि सित धकाः धाःगु खँ पत्याः यानादी मते। अमनोनयात जक स्याःगु खः।”

34 उबलय् अब्शालोम इमिगु दथुं बिस्सुं वने धुंकूगु खः।

अले पाः च्वनाच्चंम्हय्सिनं च्वय्पाखे थस्वःबलय् आकाझाकां मनूतय्गु छगू हुल होरोनैमपाखेया पहाडं क्वहां वयाच्चंगु खन। वं वयाः जुजुयात थथे धकाः खबर बिल, “स्वयादिसैं, होरोनैमपाखें पहाडं मनूतय्गु हुल क्वहां वयाच्चंगु जिं खनागु दु।”

35 योनादाबं जुजुयात धाल, “स्वयादिसैं, इपि वइतिनि धकाः जिं धया थें हे छःपिनि काय्पि झायाच्चंगु दु।”

36 वं थथे धयाच्चच्चं हे जुजुया काय्पि दुने थ्यंकः वल। अले इपि तसकं ख्वयाः विलाप यात। जुजु व वया च्यःत नं ह्यौय्ह्यौय् ख्वल।

37 अब्शालोम गशूरया जुजु अम्मीहदया काय् तल्मैयाथाय् वनाः शरण काःवन। तर जुजु न्हियान्हिथं थःकाय् अमनोनया निति विलाप यात।

38 अब्शालोम गशूरय् बिस्सुं वनाः स्वदै तक अन हे च्वन।

39 अले अमनोन सीगुया बारे दाऊदया मनय् शान्ति दयेवं व हाकनं अब्शालोमयाथाय् वनेगु मति तल।

14

अब्शालोम यस्शलेमय् लिहां वःगु

1 जुजुया मन अब्शालोमयापाखे वंगु दु धयागु खँ सस्याहया काय् योआबं सीकल।

2 अथे जुयाः वं तकोय् सुं छम्ह मनू छवयाः छम्ह बुद्धि दुम्ह मिसायात सःतके छवत। अले अन थ्यंकाः वं मिसायात धाल, “छं दुखं च्वनीम्ह मिसां थें पहः या। दुखं च्वनीबलय् फीगु वसः पयु। छेनय् चिकं तये मते, अले तःन्हु तक दुखं च्वंम्ह मिसा थें च्वंकी।

3 अले जुजुयाथाय् वनाः जिं स्यना थें धा।” अले छु धायेमाःगु खः योआबं वयात धयाबिल।

4 तकोया मिसा जुजुयाथाय् वन अले बैय् भ्वसुलाः दण्डवत यानाः थथे धाल, “महाराज! जितः ग्वाहालि यानादिसँ!”

5 जुजुं वयात न्यन, “छन्त छु दुःख जुल?”

वं लिसः बिल, “जि छम्ह विधवा मिसा खः। जिमि भाःत सी धुंकल।

6 जि निम्ह काय्पि दु। छन्हू इपि निम्ह ख्यलय् ल्वात। इमित छुतय् याइपि सुं नं मदु अथे जुयाः छम्हय्सिनं मेम्हय्सित स्यात।

7 स्वयादिसँ, आः जिमि थःथितिपिन्सं जिगु विरोधय् दनाः थथे धाल, ‘थः किजायात स्याःम्हय्सित जिमित लःल्हा अले वं थः हे किजायात स्याःगुलि जिमिसं नं वयात स्याये, अले थुकथं अधिकार याइम्हय्सित नं नाश यानाछवये।’ इमिसं थथे यात धाःसा जिमि छम्ह हे जक बचय् जूम्ह हेंगवाः मियात नं स्यानाबी। अले जिमि भाःतया नां हे ल्यं मदय्का छवयाः संसारय् सुं नं सन्तान ल्यं दइ मखु।”

8 जुजुं व मिसायात धाल, “हूँ, जिं छंगु निसाफ याये।”

9 तर तकोया व मिसां धाल, “जिमि मालिक, जिमि महाराज, स्वयादिसँ, थुकिया दोष जि व जिमि अबुया छैय् लायेमा। महाराज व वय्कःया सिंहासनयात छुं नं दोष मवयेमा।”

10 जुजुं धाल, “सुनानं छन्त छुं धाल धाःसा वयात जिथाय् हजि अले वं हाकनं छन्त गुब्सं दुःख बी मखु।”

11 व मिसां हाकनं धाल, “हिया बदला काइम्हय्सिनं मभिं याके मबीत व जिमि काय्पात नं नाश यायेगुपाखें पनेत छपिन्सं परमप्रभु थः परमेश्वरयात बिन्ति यानादिसँ।”

जुजुं थथे धयाः पाफल, “धात्थें परमप्रभु म्वाःम्ह खः थें, छिमि काय्पागु सँ छपु नं बैय् कुतुंवनी मखु।”

12 अनंलि व मिसां धाल, “स्वयादिसँ, जिं हाकनं छगू खँ छिथाय् तये फइ ला?”

जुजुं धाल, “धा।”

13 मिसां धाल, “छिसं छाया परमेश्वरया मनूतय्त थज्याःगु मभिं यानागु? जुजुं थथे धाःगुलि इपिं दोषी ठहरय् जुइ, छायाधाःसा देशं पितनाछवम्ह मनूयात छलपोलं हाकनं लिं हयादीत मानय् मजू।

14 बँय वाना: मदयावंगु ल: थें झीपिं नं छन्हु सिनावने मानि, तर परमेश्वरं प्राण कयादी मखु। बरु वयक्क:पाखें मनूत तापाना: मवनेमा धका: वयक्कलं उपाय पिकयादी।

15 “मनूतयसं जित: ख्याच्च: ब्यूगुलि जिं छित: थ्व खँ धा:वयागु ख:। जिं बिचा: याना, ‘छसपोल नापं खँ ल्हाये द:सा छिकपिनि दासीं धा:गु खँ छिं यानादी।

16 अले जि व जिमि काय्यात परमेश्वरं ब्यूगु अधिकार लाकाकायेत स्व:पिं मनूतपाखें बचय यानादी।”

17 आ: छ:पिनि दासीं थथे धाइ, ‘जिमि महाराजया वचनं जित: आराम दयेमा, छाया:सा भिं व मभिं थुइकेत छि छम्ह परमेश्वरया दूत थें ख:।’ परमप्रभु छपिनि परमेश्वर छिनापं दीमा।”

18 अनलि जुजुं व मिसायात धाल, “जित: छुं नं खँ सुमचुकूसे धा, जिं छन्त छगू न्ह्यस: न्येने।”

व मिसां धाल, “ज्यू, धयादिसँ।”

19 अले जुजुं वयात न्यन, “छन्त योआबं थथे याकेब्यूगु ख: ला?”

वं लिस: बिल, “छ:पिनिगु जीवनया नामं पाफया धाये, छ:पिन्सं न्ह्यस: न्यनीबलय लिस: बीत जवंखवं छुं हे लैपु दइ मखु। ख:, छ:पिनि दास योआबं हे जित: थ्व खँ फुक्क स्यंगु ख: अले वं हे जिगु म्हुतइ थुपिं फुक्क वचन तयाब्यूगु ख:।

20 आ:यागु अवस्थायात हीकेत छ:पिनि दास योआबं थथे या:गु ख:। छ:पिं परमेश्वरया दूत ति हे बुद्धि दुम्ह ख: अले देशय छु जुयाच्चंगु दु व फुक्कं स्यू।”

21 जुजुं योआबयात धाल, “ज्यू, जिं थथे हे याये। छ वना: व ल्यायम्मह मनू अब्शालोमयात लित ब्वना हजि।”

22 अनलि योआबं क्वमिलु जुया: बँय भ्वसुला: दण्डवत यात। अले जुजुयात हनाबना तया: थथे धया: बिदा जुल, “हे प्रभु, जिं क्वमिलु जुया: छ:पिन्त बिन्ति यानागु छ:पिन्सं नालाकयादीगुलि जित: छिगु दया दत धका: जि छिकपिनि दासं सिल।”

23 अनलि व थथें गशूरय वना: अब्शालोमयात यरुशलेमय लितब्वनाहल।

24 तर जुजुं धाल, “व थ:गु हे छैय वनेमा:। व जिगु न्ह्य:ने मवयेमा।” अथे जुया: अब्शालोम जुजुया न्ह्य:ने मवंसे थ:गु हे छै वन।

25 अब्शालोम थें बांला:म्ह व प्रशंसा याये ल्व:म्ह इस्राएलय सुं नं मदु। वयाके छयनंनिसें तुति तक छुं नं खवं मदु।

26 वं थःगु सँ इयातुसे च्वंगुलि इलय् इलय् चायेगु याइ। (वयागु सँ सरकारी तौल कथं २.३ किलोग्राम दु।)

27 अब्शालोमया स्वम्ह काय्पि व छम्ह तामार नांयाम्ह म्हाय् दु। तामार तसकं हिसि दुम्ह मिसा खः।

28 अब्शालोम निदँ तक यस्शलेमय् जुजुं मखंक च्वनाच्चन।

29 अनलि वं जुजुयाथाय् खबर छवयेत योआबयात सःतके छवल, तर योआब वये मानय् मजू। अब्शालोमं हाकनं निक्वः खुसि नं सःतके छवल अयनं व वये मानय् मजू।

30 अथे जुयाः अब्शालोमं थः चयःतय्त धाल, “योआबया छक् बुँ जिगु हे बुँ लिक्क दु अले उकी वं तछव ह्लातःगु दु धकाः ला छिमिसं सी हे स्यू। हूँ, उकियात मि छवय्काब्यु।” अले वया चयःतय्सं अथे हे यात।

31 अनलि योआब अब्शालोमया छँ वनाः वयात धाल, “छिकपिनि चयःतय्सं छाया जिगु बुँइ मि तयाब्यूगु?”

32 अब्शालोमं धाल, “स्व, जिं छपाखें जुजुयाथाय् खबर छवये फइ ला धकाः छन्त थन सःतके छवयाहया। जि गश्रं थन वयाः छाया च्वंवया च्वनेमाल? जि अन हे च्वनाच्चंसा ज्यूगु नि। अथे जुयाः आः जि जुजुया न्ह्यःने दंवने दयेमाः। अले जिं छुं टुंकागु दुसा वय्कलं जितः स्यायेमा।”

33 अथे जुयाः योआब जुजुयाथाय् वनाः थ्व फुक्क खँ कनाबिल। अले जुजुं अब्शालोमयात सःतके छवत। अब्शालोम वल, अले वं जुजुयात क्वमिलु जुयाः बैय् भ्वसुलाः दण्डवत यात। अले जुजुं अब्शालोमयात चुप्पा नल।

15

अब्शालोमया ग्वसाः

1 अनलि अब्शालोमं थःगु निति छगू रथ, सलत व नेय्म्ह मनूत थःगु न्ह्यः न्ह्यः वनेत मुंकल।

2 अले व सुथ न्हापां दनाः शहरया मू ध्वाखाय् वनेगु लँ लिक्क दनाच्चनीगु। अले सुं मनु जुजुयाथाय् वयाः निसाफ फव्वं वइबलय् अब्शालोमं व मनूयात सःताः “छ गगु शहरं वयाम्ह खः?” धकाः न्यनीगु। अले व मनुखं थथे धकाः लिसः बीगु, “स्वयादिसँ, जि इस्राएलया छगू कुलयाम्ह खः।”

3 अब्शालोमं धाल, “खः, छगु मुद्दा पाय्छि जू, तर छंगु मुद्दा न्यनीम्ह जुजुया सुं मनु मदु।”

4 अनंलि अब्शालोमं थथे धाइगु, “जितः न्यायाधीश ल्यःगु जूसा थज्याःगु मुद्दा ज्वनावइपि मनूतयत् पाय्छिगु न्याय यानाबीगु जुइ।”

5 अले सुं मनुखं वयात क्वछुनाः दण्डवत यायेत वइबलय् अब्शालोमं थःगु ल्हाः ब्वयक्काः वयात घय्पुनाः चुप्पा नइगु।

6 जुजुयाथाय् न्याय फ्वै वइपि फुक्क इस्त्राएलीतयत् अब्शालोमं बांलाःगु व्यवहार याइगु। याकनं हे इस्त्राएल्यापि सकसिनं दाऊदयात स्वयाः अब्शालोमयात ययकल।

7 प्यदैया दकलय् लिपांगु लाय् अब्शालोमं दाऊद जुजुयात धाल, “स्वयादिसँ, जिं परमप्रभुनापं यानागु भाकल पूर्वके, जितः हेब्रोणय् वनेबियादिसँ।

8 छःपिनि दास जि अराम देशया गशूरय् च्वंच्वनाबलय् परमप्रभुनापं थथे धकाः भाकल यानागु खः, परमप्रभुं जितः यरूशलेमय् लितब्वनाहयादिल धाःसा जिं हेब्रोणय् परमप्रभुया आराधना याये।”

9 जुजुं वयात धाल, “बांलाक हूँ।” अथे जुयाः अब्शालोम हेब्रोणय् वन।

10 अनंलि अब्शालोमं फुक्क इस्त्राएल्या कुलतयथाय् थथे धकाः खबर बियाः गुप्त दूतत छवल, “छिमिसं तुरही पुगु सः न्यनीबलय् तःसलं थथे धा, ‘अब्शालोम हेब्रोणया जुजु जुल!’ ”

11 अब्शालोमया खँ न्यनाः निसः मनूत वया ल्यूल्यू यरूशलेमं पिहां वंगु खः। उपि सःतातःपि खः, अले उपि मनूतयसं थ्व ग्वसाःया बारे छुं हे मस्यूसं वयागु पंलिनाः वंगु खः।

12 अब्शालोमं बलि छायाच्वंबलय् वं गीलोह शहरं गीलोनी अहीतोपेलयात सःतके छवल। अहीतोपेल दाऊदया छम्ह सल्लाहकार खः। जुजुया विरोधय् याःगु थ्व ग्वसाः अझ बल्लानावन अले अब्शालोमया पंलिइपि झन झन अप्वयावन।

दाऊद यरूशलेमं बिस्सुं वंगु

13 छम्ह दूत वयाः जुजुयात थथे खबर बिल, “इस्त्राएलीतय्गु मन अब्शालोमपाखे वंगु दु।”

14 दाऊदं यरूशलेमय् थःनापं दुपि भारदारतयत् धाल, “झीपिं अब्शालोमपाखें बिस्सुं वनेमाःगु खःसा थर्थे हे वनेमाल। मखुसा व याकनं थन वइ अले शहरय् च्वंपि सुं नं बचय् जुइ मखु।”

15 “खः, महाराज!” इमिसं लिसः बिल, “स्वयादिसँ, जिपि छसपोलया आज्ञा मानय् यायेत तयार दु।”

16 अथे जुयाः जुजु अनं वन। अले दरबारया बिचाःसंचाः याइपि झिम्ह मथ्याःपि कलाःपि बाहेक वया परिवारया फुक्क मनूत नं वयागु ल्यूल्यू वन।

17 अले जुजु व वया फुक्क मनूत शहर त्वःताः पिहां वंबलय् दकलय् लिपांगु छें दित।

18 गातपाखें जुजुनापं वःपिं खुसःम्ह गिन्ती अले करेती व पेलेथीनापं जुजुया फुक्क मनूत जुजुया न्ह्यःनं हे न्यासि वन।

19 अनंलि जुजु गिन्ती इतैयात धाल, “छ छाया जिपिनापं वयागु? लिहां वनाः अब्शालोमनापं हे च्वहँ, छायाःसा छ छम्ह परदेशी खः अले छन्त थः च्वनाच्वंगु थासं पितीना हःगु नं खः।

20 छ ला म्हिगः तिनि वःम्ह खः अले गथे यानाः छन्त जिपिनापं नु धकाः कर यायेगु? जि गन वनेगु जिं हे मस्यू। छ थःगु छँय हे लिहां हँ अले छिमि देशय् च्वपिन्त नं नापं ब्वनायकि। सदां दयाच्वनीगु दयामाया व विश्वास यायेबहः छंके दयाच्वनेमा।”

21 तर इतैनं जुजुयात लिसः बिल, “धात्थें परमप्रभु म्वाःम्ह खः थें, अले जिमि मालिक महाराज म्वाःम्ह खः थें, छःपिं गन गन च्वनादी, जि म्वायेमा वा सीमा छःपिनि दास नं अन हे दइ।”

22 अले दाऊदं इतैयात लिसः बिल, “ज्यू, न्ह्यःने न्यासि हँ।” अथे जुयाः गिन्ती इतैया फुक्क पुचः व थःनापं वयाच्वपिं फुक्क मनूत वनापं हे वन।

23 थुकथं इपिं फुक्क मनूत पिहां वंबलय् देशय् च्वपिं मनूत हँय्छँय् ख्वल। जुजु किद्रोनया ब्यासि पुलावन, अले फुक्क मनूत मरुभूमिपाखे न्ह्यज्यात।

24 सादोक पुजाहारी नं फुक्क लेवीतनापं अन हे दु। इमिसं परमेश्वरया बाचाया सनू क्वबिया यंकाच्वंगु खः। इमिसं सनू बैय् तुं तया तल उकियात क्वमब्यु, फुक्क मनूत शहरं पिहां मवतले अबियाथारं बलिदान छाल।

25 अनंलि जुजु सादोकयात धाल, “परमेश्वरया बाचाया सनू शहर दुने तुं लित यंकि। परमप्रभुं जितः दया यानादीसा वय्कलं जितः लित ब्वनाहयादी अले जिं वय्कःया बाचाया सनू व नापलायेगु पालयात हाकनं स्वये दइ।

26 वय्कः जि खनाः लयमताः धइगु खःसा, स्वयादिसँ, जि थन हे दु। अले वय्कलं थःत छु भिं ताय्कादी व हे जितः यानादीमा।”

27 जुजु सादोक पुजाहारीयात थथे नं धाल, “छु छं वइतिनिगु बारे दर्शन खंके फु, मखु ला? छ व अबियाथार, छिमि काय् अहीमास व अबियाथारया काय् जोनाथनयात नापं ब्वनाः याउँक शहरय् लिहां हँ।

28 स्वयादिसँ, छपाखें खबर मवतले जि मरुभूमिया खुसि छीगु थासय् पियाच्वनाच्वने।”

29 अथे जुयाः सादोक व अबियाथारं परमेश्वरया सनू यरूशलेमय् तुं लित यंकल, अले इपि नं अन हे च्वन।

30 तर दाऊद थःगु छयं त्वपुयाः खालि तुति ख्वख्वं जैतून डाँडाय् थहां वन। वनापं दुपिं फुक्क मनूत नं थथःगु छयं त्वपुयाः ख्वख्वं च्वय् थहां वन।

31 ग्वसाः ग्वःपिं मध्ये अहीतोपेल अब्शालोमनापं दु धकाः दाऊदयात न्यंकल। अनंलि दाऊदं थथे धकाः प्रार्थना यात, “हे परमप्रभु, अहीतोपेलया सल्लाहयात ज्यालगय् मजुइका बियादिसँ।”

दाऊदं ह्शैयात लितख्वःगु

32 दाऊद डाँडाया च्वकाय् थ्यंकः वल। व परमेश्वरयात आराधना याइगु थाय् खः, अले अरकी ह्शैन थःगु लं खुनाः छैनय् धू तयाः दाऊदयात नापलायेत वःगु खः।

33 तर दाऊदं वयात धाल, “छ जिनापं वल धाःसा जितः ब्वःझ जक जुइ,

34 अयनं छ शहरय् लिहां वनाः अब्शालोमयात ‘जि छःपिनि दास जुये। आः तक ला जि छःपिनि अबुया दास हे खनि, तर आः जि छपिनि दास जुइ’ धाल धाःसा, अहीतोपेलया सल्लायात स्यंकेत छं जितः ग्वाहालि याये फइ।

35 छं सि हे स्यू नि सादोक व अबियाथार पुजाहारीत छनापं दइ। जुजुया लायकुलिइ छु छु खँ छं न्यनी व फुक्क निम्हयसित धयाब्यु।

36 इपि नापं सादोकया काय् अहीमास व अबियाथारया काय् जोनाथन नं दु। छं छु न्यनी व इमिपाखें जितः धाय्के छवया हजि।”

37 अथे जुयाः दाऊदया पासा ह्शै शहरय् दुहां वल। उबलय् हे अब्शालोम नं यरूशलेमय् थ्यंकः वल।

16

दाऊद व सीबा

1 दाऊद वनापं दुपिं मनूत डाँडाया च्वकां भचा तापाक्क थ्यंबलय् दाऊदं मपीबोशेतया च्यः सीबायात नापलात। वं निम्ह गधालय् निसःपाः मरि, सछिज्वाँय् किसमिस, नेभाराया फल सछिज्वाँय् व छगू छेंगूया म्हिचाय् न्हगु दाखमघ काठी चिनाः हःगु दु।

2 दाऊद जुजुं सीबायात न्यन, “थुपिं फुक्क छु यायेत हयागु?”

सीबां लिसः बिल, “थुपिं गधात जुजुया परिवारयापि गयाः वनेगु निंति खः, मरि व फलत ल्याय्महिपि मनूतयत नयेगु निंति व दाखमघ धाःसा मरूभूमिइ त्यानुचाःपिनिगु निंति खः।”

3 जुजुं न्यन, “छिमि मालिकया छय् गन दु?”

सीबां धाल, “व ला यरूशलेमय हे दु, छायाःसा इस्राएलया घरानां वयात थः बाज्याया सिंहासन लितबी धकाः मतिइ तःगु दु।”

4 जुजुं सीबायात धाल, “स्व, मपीबोशेतया फुक्क सम्पत्ति छन्त दइ।”

सीबां वयात धाल, “हे महाराज, जि ला छःपिनि दास जक खः। जितः ला छःपिनिगु दया जक दःसा गाइ।”

शिमीं दाऊदयात सराः ब्यूगु

5 दाऊद जुजु बहरीमय् थ्यंकः वःबलय् अन शाऊलया घरानाया छम्ह मनू गेराया काय् शिमी वयाः दाऊदयात सराः ब्युब्युं नापलाः वल।

6 वं दाऊदयात व वया फुक्क हाकिमतयत लाः लाः थें ल्वहंचां कयकल। दाऊदया जवखवं सिपाइँत व अङ्गरक्षकत दु।

7 शिमीं दाऊदयात थथे धयाः सराः बिल, “हुँ, हुँ, अय् बदमाश! अय् ज्यानमारा!”

8 शाऊलया घरानाय् हि हाय्काः वया पलेसा राज्य यायेत स्वःम्हयसित थौं परमप्रभुं बदला कयादीगु पक्का हे खः। अले थ्व राज्य परमप्रभुं छिमि काय् अब्शालोमयात बियादिल। छ नाश जुइ धुंकल छायाःसा छ ज्यानमारा खः।”

9 अले सरूयाहया काय् अबीशैनं जुजुयात धाल, “स्वयादिसँ, थ्व सीम्ह खिचां छाया छितः सराः बियाच्चंगु? जि उखेपाखे वनाः वयागु छयं घेनाबी।”

10 तर जुजुं धाल, “अय् *सरूयाहया काय्पि, छिमित जिनापं छु मतलब? परमप्रभुं हे वयात दाऊदयात सराः ब्यु धकाः धाःगु खःसा सुनां वयात पनेगु?”

11 दाऊदं अबीशै व वया फुक्क हाकिमतयत धाल, “जिमि थः हे काय्नां ला जितः स्यायेत स्वयाच्चंगु दु धाःसा थ्व बेन्यामीनीं छाया थथे मयाइ धकाः? वयात छुं याये मते अले वं सराः बीमा। छायाःसा परमप्रभुं ‘हे वयात अथे या’ धकाः धाःगु जुइफु।

12 सके थौं जितः परमप्रभुं थ्व सराःया पलेसा जिगु दुःखयात स्वयाः आशिष बियादी।”

13 अथे जुयाः दाऊद व वया मनूत थःगु लँपुइ वन। शिमी धाःसा याकःचा दाऊदया लँपु उखेपाखे डाँडाय् वन अले वं दाऊदपाखे ल्वहंचां व धुलं कय्काः सराः ब्युब्युं वन।

14 जुजु व वया फुक्क मनूत यर्दनया लिक्क थ्यंबलय् त्यानुचाल, अले इमिसं अन आराम काल।

अब्शालोम यरूशलेमय् वंगु

15 अब्शालोम व वनापं वःपि फुक्क इस्राएलीत यरूशलेमय् थ्यंकः वल। अहीतोपेल नं इपि नापं हे दु।

16 अनंलि दाऊदया पासा अरकी ह्शैनं अब्शालोमयात नापलात, अले वं धाल, “जुजुया जय जुइमा! जुजुया जय जुइमा!”

17 अब्शालोमं वयात न्यन, “छं पासा दाऊदयात क्यंगु भक्ति गन वन? छ छाया छं पासानापं मवनागु?”

18 ह्शैनं लिसः बिल, “जि गुकथं वनापं वने फइ? सुयात परमप्रभुं व थुपि मनूतयसं ल्यःगु खः, जि नं वनापं हे च्वने।

19 हाकनं जिं सुयागु सेवा यायेगु? छु काय्या सेवा याये म्वाः ला? गथे जिं छपिनि अबुया सेवा याना अथे हे जिं छपिनिगु नं सेवा याये।”

20 अब्शालोमं अहीतोपेलयात धाल, “जिमित छिसं सल्लाह बियादिसँ। जिमिसं गुकथं ज्या यायेगु?”

21 अहीतोपेलं लिसः बिल, “छःपिनि अबुं लायक् स्वयेत त्वःतावपि वया मथ्याःपिं कलाःपिं नापं घँ। अले छःपिन्त छिकपिनि अबुं तसकं मयय्कल धइगु खँ फुक्क इस्राएलीतयसं न्यनी। छःपिनि ल्यूजुइपिनिगु ल्हाः तसकं बल्लाइ।”

22 अथे जुयाः इमिसं कःसिइ अब्शालोमया नितिं छगू पाल ग्वयाबिल, अले फुक्क इस्राएलीतयसं खंक व थः अबुया मथ्याःपिं कलाःपिं नापं घन।

23 उपिं दिनय् अहीतोपेलया सल्लाह परमेश्वरनापं खँ ल्हाइम्हयसिगु ति हे तायकिगु खः। दाऊद व अब्शालोमं अहीतोपेलया फुक्क सल्लाहयात मानय् याः।

17

अब्शालोमयात ह्शैया मिलय् मजूगु सल्लाह

1 हाकनं अहीतोपेलं अब्शालोमयात धाल, “जितः थौं चान्हय् दाऊदयात लिनायंकेत झिनिद्रुःम्ह मनू ल्यय्के बियादिसँ।

2 व त्यानुचायाः थाकुयाच्चंबलय् हे जिं वयात हमला याये। वयात जिं तसकं ख्याये, अले वया फुक्क मनूत छ्यालब्याल जुयाः बिस्युं वनी। जिं जुजुयात बाहेक मेपि सुयातं स्याये मखु।

3 छिसं माला च्वनादीम्ह दाऊदयाथाय् फुक्क मनूत लिहां वः थें*, जिं फुक्क मनूतयत् छिथाय् लित हये। अनंलि ल्यंदुपि फुक्क मनूतयत् शान्ति दइ।”

4 थ्व सल्लाह अब्शालोम व इस्राएली थकालितयत् बांलाः ताल।

5 तर अब्शालोमं धाल, “अरकी हशैयात सःतके छ्व, अले वं छु धाइ व झीसं न्यनेनु।”

6 हशै वल अले अहीतोपेलं धाःगु फुक्क खँ अब्शालोमं वयात धाल, “अहीतोपेलं जिमित थज्याःगु सल्लाह ब्यूगु दु। जिमिसं वं धाःथें याये कि मयाये? वं धाःथें मयायेगु खःसा छु यायेगु? छं हे जिमित धयाब्यु।”

7 हशैनं लिसः बिल, “थुपालय् अहीतोपेलं छितः ब्यूगु सल्लाह पाय्छि मजू।

8 छिसं हे धयादिसँ, छपिनि अबु दाऊद व वया सिपाईत तसकं बल्लाःपि खः। इपि ला थः मचा लाका यंकूम्ह मिसाम्ह भालू थें ग्यानापुसे च्वंगु दु। छिकपिनि अबु सःस्यूम्ह तसकं बल्लाःम्ह सिपाई खः। चान्हय् व थः मनूतनापं घनी मखु।

9 थ्व इलय् व गुफा व मेमेथाय् सुचुला च्वंगु जुइमा। दाऊदं छिकपिनि सिपाईतयत् न्हापा हमला यात धाःसा थ्व खँ न्यनिपिन्सं थथे धाइ ‘अब्शालोमया सिपाईत फुक्कं नाश जुल।’

10 थुकथं जुइबलय् न्हाथें ज्याःम्ह बल्लाःम्ह व सिंहया थें ज्याःगु नुगः दुम्ह मनू जूसां नं ग्याइ छायाधाःसा फुक्क इस्राएलं छिकपिनि अबु तसकं बल्लाःम्ह सिपाई खः धकाः स्यू। अले वया सिपाईत नं तसकं बल्लाःपि खः।

11 अथे जुयाः जिगु थ्व सल्लाह दु, दानंनिसें दच्छिनया बेशेबाया सिथय् तक दुपि फुक्क इस्राएलीतयत् छथाय् मुंकि। इपि समुद्रया सिथय् च्वंगु फि थें अल्याख दइ, अले छि थः हे लडाइँलय् इमिगु न्ह्यलुवाः जुयाः यंकी।

12 दाऊदयात लुइकेबलय् झीसं ख्यलय् सुतिलः क्वहां वः थें वयात हमला याये, अले वया म्वाःपिं मनूत छम्ह नं ल्यं दइ मखु।

13 दाऊद छुं शहरय् शरण कयाच्चंगु जूसां फुक्क इस्राएलं व शहरयात खिपतं चिनाः जगय् छग्वः नं ल्वहं ल्यंमदय्कः लुयाः ब्यासिइ थ्यंकाबी।”

* 17:3 १७:३ सेप्टुजेन्ट हस्तलिपिइ भम्चा थः भाःतयाथाय् लिहां वः थें अयनं छिं छम्ह हे जक मनूया प्राण माला च्वन।

14 अब्शालोम व फुक्क इस्राएलीतयसं धाल, “अहीतोपेलया सल्लाह स्वयाः हशैयागु सल्लाह हे बांलाः।” छायाःसा परमप्रभुं अब्शालोमयात नाश यायेत अहीतोपेलया बांलाःगु सल्लाहयात मानय् मयाकेगु क्वछिनादी धुंकूगु खः।

हशैया पाय्छिगु सल्लाह न्यनाः दाऊद बिस्सुं वंगु

15 अनंलि हशैनं सादोक व अबियाथार पुजाहारीयात थःमं व अहीतोपेलं छु छु सल्लाह अब्शालोम व इस्राएली नायःतयूत ब्यूगु खः व न्यंकल।

16 हशैनं धाल, “आः याकनं यानादिसँ! छि मरूमूमिया सिथय् चा मछ्यासे याकनं खुसि पुलाहुँ, मखुसा जुजु व वय्कःया मनूत शत्रुतयगु लहातय् लाइन वा इमिसं स्याइगु भय दु धकाः जुजुयाथाय् खबर छवयादिसँ।”

17 अबियाथारया काय् जोनाथन व सादोकया काय् अहीमास एन-रोगेलय् च्वनाच्चंगु खः। शहरय् दुने छु छु जुयाः च्वंगु दु व खबर छम्ह मिसां धुवांधु वया बीगु, अले इमिसं दाऊदयात खबर बीगु। छायाःसा मनूतयसं खंक खंक इपिं शहरय् दुने दुहां वनेगु आँट मयात।

18 तर थुपालय् छम्ह ल्याय्महयसिनं इमित खन। अले वं वनाः अब्शालोमयात धयाबिल। अथे जुयाः इपिं निम्हं हथाय् चाचां बहरीमय् छम्ह मनूया छैय् वनाः च्वंवन। व छैया न्ह्यःने छगू तुं दुगु जुयाच्चन अले इपिं व हे तुथि दुने दुहां वन।

19 वया कलातं त्वपुइगु छुं हयाः तुंयागु प्वाः तिनाबिल अले उकी घःने अन्न तयाः निभालय् पानातःगु थें याना तल। अले अन छु दु धयागु सुनानं मसिल।

20 अले अब्शालोमया मनूत वयाः व मिसायाके न्यन, “अहीमास व जोनाथन गन दु?” व मिसां इमित लिसः बिल, “इपिं खुसि पुलावने धुंकल।” इमिसं इपिं निम्हय्सित नं मालाः लुइके मफुत अले इपिं यरूशलेमय् तुं लिहां वन।

21 अनंलि इपिं वने धुंकाः अहीमास व जोनाथन तुथिं पिहां वल अले दाऊद जुजुयाथाय् वनाः फुक्क खँ न्यंकल। इमिसं दाऊदयात धाल, “याकनं दनाः खुसि छिनाः झासँ!” अले इमिसं दाऊदयात अहीतोपेलं जुजुया विरोधय् दय्कूगु योजना फुक्क कनाबिल।

22 अथे जुयाः दाऊद व वया फुक्क पुचःत हथाय् चाचां यर्दन खुसि छिनावन। अले सुथय् खिउँ खिउँ धाःबलय् तक खुसिया उखेपाखे मथ्यपिं सुं नं मन्त।

23 थःमं बियागु सल्लाह मानय् मयाःगु अहीतोपेलं थुइकल अले वं थःगु गधाया म्हय् सामान चिनाः थःगु शहरपाखे थःगु हे छैं तुं लिहां वन। वं थःगु छैय् फुक्क

मिलय् यानाः थः यग्गानाः सित। थुकथं व सित अले वयात वया हे अब्बा चिहानय् थुनाबिल।

24 अब्शालोम व फुक्क इस्राएलीत यर्दन खुसि छिनावन तर दाऊद न्हापा हे महनोमय् थ्यंकः वने धुंकूगु खः।

25 अब्शालोमं योआबया थासय् अमासायात सेनापति दय्क्ल। व इस्राएली येतेरया काय् व योआबया मां सस्याहया क्यहें अले नाहाशया म्हाय् अबीगेलया काय् खः।

26 अले इस्राएलीतय्सं व अब्शालोमं गिलादया जिल्लाया छ्ठाउनी तल।

27 दाऊद महनोमय् थ्यंकः वःबलय् अम्मोनितय् रब्बाय् च्वनीम्ह नाहाशया काय् शोबी, लो-देबारय् च्वनीम्ह अम्मीएलया काय् माकीर व रोगलीमय् च्वनीम्ह गिलादी बर्जिल्लैनं

28 लासाफांगा, थलबल व ख्वलात हयाः वयात बिल। इमिसं छव, तछव, छुचुं, छुस्यामुस्या, सिमी, दाल

29 कस्ति, धौ, फैत व सायागु दुरुं पिकयातःगु पनीर नं हयाः दाऊद व वनापं वःपिं मनूतय् नयेगु निंति बिल, छायाःसा मनूत मरूभूमिइ नयेपित्याकाः, लः प्याये चाय्काः व त्यानुचायाः वःगु खः धकाः इमिसं सीकल।

18

अब्शालोम सीगु

1 दाऊदं थःनापं दुपिं मनूतय् लडाइँ यायेत मुंकल, अले द्रुःछि द्रुःछि व सछि-सछि पुचःया कप्तानत ल्यल।

2 अनंलि वं थः सिपाइँतय् स्वब्बः थल। स्वब्बय् छब्ब योआबया अधीनय्, स्वब्बय् छब्ब सस्याहया काय् योआबया किजा अबीशैया अधीनय्, व स्वब्बय् छब्ब गिन्ती इतैया अधीनय् तयाः छवल। जुजुं सिपाइँतय् धाल, “जि नं छिपिनापं लडाइँलय् वने।”

3 तर मनूतय्सं धाल, “मखु, छसपोल झायादी म्वाः। छुं जुयाः जिपिं बिस्युं वये माःसा जिमित सुनानं वास्ता याइ मखु। जिपिं बच्छि हे सीसां नं इमिसं वास्ता याइ मखु। तर छसपोल ला जिपिं झिद्रुःति हे ग्यं। अथे जुयाः छपिं शहरय् हे च्वनाः जिमित ग्वाहालि यानादीसा बांलाइ।”

4 जुजुं लिसः बिल, “अथे खःसा छिमित छु पाय्छि जू जिं व हे याये।”

अथे जुयाः जुजु मूध्वाखाय् दनाच्चन, अले सिपाइँत द्रुःछि द्रुःछि व सछि सछिया इवः जुजुयागु हे न्ह्यःनं वन।

5 जुजुं योआब, अबीशै व इतैयात थथे आज्ञा बिल, “जिगु कारणं व ल्यायमम्ह अब्शालोमयात बांलाःगु व्यवहार या।” अब्शालोमयात बचय् या धकाः जुजुं कप्तानतय्त ब्यूगु आज्ञा फुक्क सिपाइँतय्सं नं न्यन।

6 अनंलि दाऊदया सिपाइँत इस्राएलीतयगु विरोधय् लडाइँ यायेत वन, अले लडाइँ एफ्राइमया जंगलय् जुल।

7 अन दाऊदया सिपाइँत नापं इस्राएलीत बुत। उखुन्हु हे निइद्रुः मनूत सित। थुकथं इपि बांमलाक नाश जुल।

8 अन नं लडाइँ प्यखेरं न्यनावन। जंगलय् नाश जूपि तरवारं स्याःपि स्वयाः अप्वः जुल।

9 दाऊदया छुं मनूतय्सं अब्शालोमयात खन। व छम्ह खच्चर गयाः वनाच्चंगु खः। खच्चर छमा तःमागु सिमा क्वसं वनाच्चंगुलि अब्शालोमया सँ सिमाया कचाय् तक्यनाः यग्गात। व आकाश व पृथ्वीया दथुइ यगानाच्चन। खच्चर धाःसा अनं पुलावन।

10 दाऊदया छुं मनूत मध्ये छम्हयसिनं थ्व खनाः योआबयात थथे धाल, “धात्थें जिं अब्शालोमयात तःमागु सिमाया कचाय् यगानाच्चंगु खना।”

11 थ्व खँ कंवःमहयसित योआबं धाल, “छं वयात धात्थें हे खंगु खः ला? अयस्सा छं उबलय् छाया वयात मस्यानागु? छं वयात स्याःगु जूसा जिं छन्त झिक् वःया कुचा व पद थकयागु चिंकथं जँनी बिइगु।”

12 तर व मनुखं लिसः बिल, “छि जितः द्रुःछि कुचा वः ब्यसां नं जिं जुजुया काय्या विरोधय् थःगु ल्हाः ल्हने फइ मखु। छायाःसा जुजुं छि, अबीशै व इतैयात थथे आज्ञा ब्यूगु जिं न्यनागु दु, ‘सुनां व ल्याय्महम्ह अब्शालोमयात नापलाइ जिगु कारणं वयात स्याये मते।’

13 छुं जुयाः जिं जुजुया उजं मानय् मयासँ अब्शालोमयात स्याःगु जूसा जुजुं थ्व खँ सी अले छिसं जितः बचय् यानादी मखुगु।”

14 योआबं धाल, “छनापं खँ ल्हानाः जिं थःगु ई सितिं छवये मखु।” अले योआब अब्शालोम दुथाय् वन, अले वं स्वंगू च्वामुसे च्वंगु कथि कयाः म्वाःम्वाकं हे सिमाय् यग्गायाच्चंम्ह अब्शालोमया छातिइ सुयाबिल।

15 अले योआबया ल्वाभः ज्वनिपिं झिम्ह सिपाइँतय्सं अब्शालोमयात घेरय् यानाः स्यानाबिल।

16 अनंलि योआबं तुरही पुल, अले सिपाइँतयसं इस्राएलीतयत् लिइगु त्वःतल छायाधाःसा योआबं सिपाइँतयत् अथे याये मते धकाः पंगु खः।

17 अले इमिसं अब्शालोमया सीम्हयात यंकाः जंगलया तःधंगु गालय् वान्छवयाः उकी घःने ल्वहं ट्रँचिनाबिल। अबलय् हे फुक्क इस्राएलीत थथःगु छँय् बिस्सुं वन।

18 अब्शालोमं थः म्वानाच्चंबलय् जुजुया ब्यासिइ छगू थां धस्वाकूगु खः छायाधाःसा वं थथे बिचाः याइगु, “जिगु नां लयंकातयेत जि छम्ह नं काय् मदु।” अथे जुयाः वं व थांयात थःगु हे नां तल, अले थौं तक नं व थांयात अब्शालोमया इवाता धकाः धाइ।

दाऊदं थःकाय् अब्शालोम सीगु खँ न्यनाः विलाप याःगु

19 सादोकया काय् अहीमासं धाल, “परमप्रभुं जुजुयात थः शत्रुतयगु ल्हातं बचय् यानादिल धयागु खबर जुजुयात याकनं ब्यु वनेत जितः अनुमति बियादिसँ।”

20 तर योआबं लिसः बिल, “थौंयागु दिं छं समाचार यंके मते, मेगु दिनय् जक यंकूसां ज्यु, तर थौं मखु, छायाधाःसा जुजुया काय् सी धुंकूगु दु।”

21 अनंलि योआबं छम्ह कूशी दासयात धाल, “छं खंगु फुक्क खँ वनाः जुजुयात धयाब्यु।” व कूशीं क्वछुनाः योआबयात दण्डवत यात अले अनं ब्वाँय् वन।

22 अले सादोकया काय् अहीमासं योआबयात हाकनं बिन्ति यानाः थथे धाल, “न्द्वागु हे जूसां जितः व कूशीया ल्यूल्यू ब्वाँय् वनेबियादिसँ।”

योआबं न्यन, “हे जिमि काय्, छ छाया वनेमाल? छंगु समाचारया निति छन्त छुं नं सिरपाः दइ मखु।”

23 अहीमासं धाल, “न्द्वागु हे जूसां जि ब्वाँय् वने।”

अथे जुयाः योआबं धाल, “अथे जूसा हूँ।” अनंलि अहीमास यर्दनया ख्यलय्यागु लैपु जुयाः ब्वाँय् वन अले व कूशीयात लिपालाकाः न्ह्यःने ब्वाँय् वन।

24 उबलय् दाऊद निगू लुखाया दथुइ च्वनाच्चंगु खः। अले पिवाः च्वनीम्हं पखाःया मू ध्वाखाया पिवाः च्वनीगु थासय् वनाः स्वःवंबलय् छम्ह मनू याकःचा ब्वाँय् वयाच्चंगु खन।

25 व पिवाः च्वनीम्ह मनुखं तःसलं दाऊदयात थ्व खँ कनाबिल।

जुजुं धाल, “व याकःचा जक ब्वाँय् वःगु खःसा वं पक्का हे बांलाःगु समाचार हःगु जुइमाः।” अले व मनू लिक्क थयंकः वल।

26 अनंलि हाकनं व पिवाः च्वनीम्ह मनुखं मेम्ह छम्ह मनू नं याकःचा हे ब्वाँय् वयाच्वंगु खन। अले व पिवालं क्वय् ध्वाखाय् च्वंम्ह पिवाःयात धाल, “स्वसा हाकनं मेम्ह छम्ह मनू नं याकःचा हे ब्वाँय् वयाच्वंगु दु।”

“जुजुं धाल, वं नं बांलाःगु हे समाचार हःगु जुइमाः।”

27 व पिवालं धाल, “स्वयादिस्, व न्हापां ब्वाँय् वःम्ह ला सादोकया काय् अहीमास थें च्वं।”

जुजुं धाल, “व छम्ह बांलाःम्ह हे मनू खः, भिंगु हे समाचार ज्वनाः वयाच्वंगु दु।”

28 अनंलि अहीमास जुजुया न्ह्यःने बैय् भ्वसुलाः तःसलं थथे धाल, “फुक्क पाय्छि जू।” “परमप्रभु छिकपिनि परमेश्वरया प्रशंसा जुइमा! छिगु विरोधय् दंपि मनूतय्त छिगु हे ल्हातय् बियादीगु दु।”

29 जुजुं वयाके न्यन, “छु ल्याय्म्हम्ह अब्शालोमयात आराम दु ला?”

अले अहीमास लिसः बिल, “छसपोलया दास योआबं जुजुया सेवक व जि छिकपिनि दासयात छव्याहःगु खः। जिं ला तसकं खलबल जूगु खनागु दु, तर छु जूगु खः व धाःसा जिं मस्यू।”

30 जुजुं आज्ञा बिल, “चिलाः थन दें।” अले व वनाः छखेपाखे दंवन।

31 अनंलि व कूशी वयाः धाल, “जिमि मालिक महाराज, स्वयादिस्, समाचार बांलाः! छसपोलया विरोधय् दंपि सकसिगुपाखें परमप्रभुं छितः थौं उद्धार यानादीगु दु।”

32 अले जुजुं कूशीयाके न्यन, “छु व ल्याय्म्हम्ह अब्शालोमयात आराम दु ला?”

कूशी लिसः बिल, “जुजुया फुक्क शत्रुत व फुक्क छिगु विरोधय् दनिपिं अले छसपोलयात मभिं याइपिनिगु गति नं व ल्याय्म्हम्ह मनूया थें हे जुइ।”

33 अनंलि जुजु तसकं दुःख मन ताय्काः मू ध्वाखाया च्वय्यागु कोथाय् वनाः ख्वः वन, अले जुजु थथे धाधां ख्वख्वं वन,

“जिमि पुताः! जिमि काय् अब्शालोम, जिकाय् अब्शालोम!

छंगु पलेसा जि सीगु जूसा ज्यूगु नि!

अय् अब्शालोम, जिकाय्, जिकाय्!”

19

योआबं दाऊदयात ह्यय्कूगु

1 अब्शालोमया निंति जुजु ख्वख्वं विलाप यानाच्चंगु दु धयागु खँ योआब न्यन।

2 अले व दिखुन्हया त्याःगुया लसताया पलेसा फुक्क सिपाईतय्सं दुखं च्वनेमाल। छायाःसा जुजुं थः काय्या निंति विलाप यानाच्चंगु दु धयागु खँ इमिसं न्यन।

3 इपि लडाईलय् बुनाः बिस्सुं वनाः ख्वाः क्यने मछाःपिं थें न्वमवासे शहरय् दुने दुहां वन।

4 जुजुं थःगु ख्वाः त्वपुयाः ततसलं थथे धाल, “हे जिकाय् अब्शालोम! हे अब्शालोम, जि पुताः, जिकाय्!”

5 अनलि योआब जुजुया छँय् वयाः वयात थथे धाल, “छिगु प्राण, छिकपिनि काय्पि, म्हाय्पि, कलाःपि व मथ्याःपि कलाःपिनिगु प्राण बचय् याःपि फुक्क मनूतयगु निंति छिसं थौं मछालापुइकादीगु दु।

6 छिसं थः शत्रुतय्त माया यानादी, अले छितः माया याइपिन्त घृणा यानादी। छसपोलं जिपि सेनापतित व झी थः मनूत छिगु न्ह्यःने छुं नं मखु धकाः थौं बांलाक क्यनादिल। छुं जुयाः थौं अब्शालोम म्वानाः जिपि फुक्क सीगु जूसा छि लय्तायादी धकाः जिं सिल।

7 आः याकनं झासँ थः मनूतय्त हपाः बियादिसँ। छुं जुयाः छिसं थथे मयात धाःसा जिं परमप्रभुया नामं पाफयाः धाये, थौं बहनि तक छम्ह नं छिनापं दइ मखु। अले थ्व छिगु जीवनय् वइगु दक्खिसिबय् तःधंगु विपत्ति जुइ।”

8 अनलि जुजु दनाः वनाः शहरया ध्वाखा लिक्क च्वंवन। अले फुक्क मनूतय्सं “जुजु ध्वाखा लिक्क च्वनाच्चंगु दु” धकाः न्यन अले इपि सकलें जुजुया न्ह्यःने वल।

दाऊद यरूशलेमय् लिहां वःगु

अबलय् अब्शालोमयात ग्वाहालि याःपि फुक्क इस्त्राएलीत थथःगु छँय् बिस्सुं वने धुंकुगु खः।

9 अले इस्त्राएलया फुक्क कुलत थथे धयाः जवाःसवाः यानाच्चन, “जुजुं झीत थः शत्रुतपाखें छुत्कारा यानादिल, अले पलिशतीतयगु शक्तिं बचय् यानादिल, आः अब्शालोमं यानाः जुजु देशं बिस्सुं वंगु दु।

10 तर झीसं झी जुजु अभिषेक यानाम्ह अब्शालोम लडाईलय् सी धुंकल। अथे जुयाः जुजुयात लित हयेगु उपाय छाया मयायेगु?”

11 अले दाऊद जुजुं पुजाहारीत सादोक व अबियाथारयात थथे धकाः खबर छ्वयाहल, “यहूदाया थकालितय्त न्यँ, ‘जुजुयात वय्कःया दरबारय् हयेत छाया

लिबाका च्वनागु? छायाःसा फुक्क इस्राएलीतयगु बिचाः जुजुया छैय् थ्यने धुंकल।

12 छिपि सकलें जि थः हे दाजुकिजापि खः, जिगु हे ला हि खः। जुजुयात लित ब्वनाहयेत छाया तसकं लिबाका च्वनागु?

13 अले अमासायात थथे धा, छु छ जिगु ला व हि मखु ला? छ योआबया पलेसा छंगु जिवंकाःछि हे जिम्ह सेनापति मजुल धाःसा परमेश्वरं जिनापं बांमलाःगु व्यवहार यानादीमा।’ ”

14 दाऊदया थ्व खबरं यानाः यहदाया फुक्क मनूतयगु मन छम्ह हे मनू थें यानाः त्याका काल। अले इमिसं जुजुयात थः फुक्क मनूतनापं लिहांझासँ धकाः बिनित्ति यानाछवल।

15 अथे जुयाः जुजु यर्दनय् लिहां वल।

अले यहदायापि मनूत जुजुयात नापलायेत व यर्दन खुसि उखेपाखे जुजुयात यंकेत गिलगालय् वल।

16 थुबलय् हे बहरीमय् च्वंम्ह बेन्यामीनी गेराया काय् शिमी दाऊद जुजुयात नापलायेत हथाय् चाचां यहदाया मनूतनापं यर्दनय् वन।

17 वनापं शाऊलया घरानाया मू च्यः सीबा, थः झिंन्याम्ह कायपि व निइम्ह च्यःत अले द्रुःछि बेन्यामीनीतय् ज्वनाः वन। इपिं यर्दनय् ब्वाँय् ब्वाँय् वन। अन जुजु च्वनाच्वंगु खः।

18 अले इमिसं जुजुया घरानायात खुसि छिनाः उखेपाखे यंकल अले इपिं सकसिनं जुजुया आज्ञा कथं यायेत सकलें मानय् जुल।

अले गेराया काय् शिमी खुसि छिनावनाः जुजुया न्ह्यःने भ्वसुल,

19 अले जुजुयात थथे धाल, “छसपोलं जितः दोष बियादिल जुइमा। छिसं यस्शलेम त्वःतादीगु दिनय् जिं यानागु अपराधयात त्वमंकादिसँ। थ्व खँ छिगु मनय् नं तयादी मते।

20 छायाःसा जिं पाप यानागु दु, तर स्व, थौं फुक्क योसेफया घराना मध्ये छितः न्हापालाक नापलानाम्ह मनू जि हे खः।”

21 अनलि सस्याहया काय् अबीशैनं धाल, “परमप्रभुं अभिषेक यानातःम्ह जुजुयात सराः ब्यूगु कारणं शिमी सीमाःगु मखु ला?”

22 दाऊदं लिसः बिल, “हे सस्याहया कायपि, छिमिगु जिनापं छु स्वापु दु? छिपि थौं जिगु विरोधी जूगु दु। आः जि इस्राएलया जुजु जूगु दु अथे जुयाः थौं सुं नं इस्राएलीत सी मखु।”

23 अनंलि जुजुं शिमीयात धाल, “आ: छ सी मखुत।” अनंलि जुजुं पाफया: थ्व खँ क्व:छित।

दाऊदं मपीबोशेतयात माया या:गु

24 अले शाऊलया छय् मपीबोशेत नं जुजुयात नापलायेत क्वय् क्वहां वल। जुजुं यरूशलेम त्व:ता वंगु दिनंनिसें लिहां मवतले, मपीबोशेतं न तुति सिल, न दाही चाल, न थ:महं फिनात:गु लं हे हिल।☆

25 मपीबोशेत जुजुयात नापलायेत यरूशलेमं व:बलय् दाऊदं वयात धाल, “मपीबोशेत, छ जिनापं छाया मवयागु?”

26 वं लिस: बिल, “छसपोल, स्वयादिसँ, जि च्य: सीबां जित: धोखा बिल। जि ला गधाया म्हय् काठी तया: जुजुनापं वनेगु इच्छा यानाच्चवनागु ख:, तर जि छिकपिनि दास खुत्यांमह ख: अले जिं मसीकं हे वं जित: त्व:तावन।

27 वं जिगु विरोधय् छिनापं खँ ल्हा:गु दु। छसपोल परमेश्वरया दूत थें ख:। आ: छित: छु पायछि जु व हे यानादिसँ।

28 जिमि बाज्याया फुक्क घराना छिगु ल्हातं सीमा:पिं ख: तर छिकपिनि दास जित: छिसं थ:नापं हे नयेत्वने बियादिल। थुलि त:धंगु दया दया: नं जिं मेगु अप्व: छु आशा याये माल?”

29 जुजुं लिस: बिल, “फेतु, जिं पक्का याये धुन, छ व सीबां निम्हय्सिनं बुँ इनाका।”

30 मपीबोशेतं धाल, “वं हे फुक्क कायेमा, छाया:सा छि याउँक छेंय् थयंक: झाल।”

31 गिलादी बर्जिल्लै नं रोगलीमं क्वय् क्वहां वल, अले जुजुयात यर्दन छिकेत ग्वाहालि यायेत जुजुयाथाय् वल।

32 बर्जिल्लै धा:सा चयदँ दये धुंकूम्ह बुराम्ह मनु ख:। जुजु महनोमय् च्वनाच्चबलय् वं हे जुजुयात नयेगु नसा यंकीम्ह ख: छाया:सा व तसकं त:मिम्ह ख:।☆

33 जुजुं बर्जिल्लैयात धाल, “छ जिनापं खुसि छिना: वनेनु, यरूशलेमय् छ जिनापं च्वँ। जिं अन छंगु निति नयेत्वनेगु मिलय् यानाबी।”

34 बर्जिल्लैनं जुजुयात लिस: बिल, “छिकपिनि दास छिनापं यरूशलेमय् वनेत तसकं बुरा जुइ धुंकूगु दु।

35 जि चयदँ दये धुंकल। भिं व मभिंया ज्ञान जिं सीके मफये धुंकल। जिं नयेत्वनेगु नं छुं सवा: मथुइ धुंकल। मिजं व मिसां म्ये हा:गु नं जिं मताये धुंकल। अथे जुया: जि छिनापं वना: छिगु निंति छाया ब्व:झ जुइगु?

36 बरु छसपोलया दास यर्दन छिना: भतिचा जक छिनापं वने। तर जुजुं छाया जित: थज्या:गु बांला:गु सिरपा: बियादियागु?

37 जित: लिहां वनेत उजं बियादिसँ, अले जि थ: मां-बौया चिहान लिक्क जिमिगु हे शहरय ल्यंदनिगु दिं बितय या: वने। थन छिगु सेवा यायेत छिकपिनि दास किमहाम द हे दु नि। वयात छिनापं हे उखेपाखे यंकादिसँ, अले छसपोलयात छु पायछि जू वयात अथे हे यानादिसँ।”

38 जुजुं लिस: बिल, “अथे ख:सा किमहाम जिनापं उखेपाखे वयेमा, अले छन्त छु य: जिं वयागु निंति अथे हे याये। अले छं जिके छु फ्वन जिं छंगु निंति यानाबी।”

39 अनंलि फुक्क मनूत यर्दन छिनावन, अले दकलय लिपा जुजु छिनावन। अले जुजुं बर्जिल्लैयात चुप्पा नल, अले वयात आशिष बिल अले बर्जिल्लै थ:गु छँ तं लिहां वन।

40 अले जुजु खुसि छिना: गिलगालय वन, किमहाम नं व हे नापं दु। यहदाया फुक्क मनूत व इस्राएलया बच्छि मनूतयसं मिलय जुया: जुजुयात खुसि छिका: उखेपाखे थयंकाबिल।

41 अनंलि इस्राएलया फुक्क मनूत छथाय मुना: जुजुयाथाय वल। अले इमिसं थथे धाल, “छाय जिमि दाजुकिजा यहदाया मनूतयसं छित: यंकल? अले जुजु व वया घराना अले वया फुक्क मनूत मिलय जुया: जुजुयात यर्दन छिका: उखेपाखे यंकल।”

42 यहदाया फुक्क मनूतयसं लिस: बिल, “छाय्हा:सा महाराज जिमि थ:ला:मह ख:। छि छाया तंम्वयादियागु? छु जिमिसं जुजुया धन नयागु दु ला? छु जिमिसं छुं कोसेलि थ:पिनिगु निंति कयागु दु ला?”

43 इस्राएलया मनूतयसं यहदाया मनूतयत् लिस: बिल, “जुजुयाके जिमिगु झिब्व दु अले व बाहेक दाऊदयाके छिमिगु स्वया: जिमिगु अझ अप्व: हक दु। छिकपिन्सं छाया जिमित क्वह्यंकागु? छु जुजुयात लित ब्वनाहयेगु खँ जिमिसं न्हापा हे धयागु मदु ला?”

तर यहदाया मनूतयसं इस्राएलया मनूत स्वया: झन अप्व: कडा व्यवहार यात।

20

शेबा विरोधी जूग

1 शेबा नांयाम्ह छम्ह मभिंम्ह मनू गिलगालय् दु। व बेन्यामीनी बिक्रीया काय् खः। वं तुरही पुल अले तःसलं थथे धाल,
“दाऊदयाके जिमिगु छु भाग दु?

यिशैया काय्याके जिमिगु छुं नं अधिकार मदु।
हे इस्राएल, छिपिं फुक्क थथःगु पालय् हूँ!”

2 अयज्जुगुलि इस्राएलया मनूत दाऊदयात त्वःताः बिक्रीया काय् शेबाया ल्यूल्यु वन। तर यहूदाया मनूत धाःसा दाऊदनापं हे वन अले इपिं यर्दननिसें यरूशलेम तक हे दाऊदया ल्यूल्यु वन।

3 दाऊद यरूशलेमय् थःगु दरबारय् थ्यंबलय् थःम्हं दरबार स्वयेत तयातःपिं झिम्ह मथ्याःपिं कलाःतय्त यंकाः मेगु छें कुनातल। वं इमित नयेत्वनेगु मिलय् यानाबिल, अयनं इपिं नापं घं मवं। थुकथं इमित मसीतले हे कुनातल। इपिं भाःत मदुपिं मिसातयसं थें जीवन हनाच्चने माल।

4 अनंलि जुजुं अमासायात धाल, “यहूदाया मनूतय्त छथाय् मुंकि, अले स्वन्ह्या दुने इमित छनापं जिथाय् हजि।”

5 तर अमासा यहूदाया मनूतय्त मुंकेत वंबलय् जुजुं क्वछिनाब्यगु ई स्वयाः नं वं अप्वः ई बीकल।

6 दाऊदं अबीशैयात धाल, “बिक्रीया काय् शेबां झीत अब्शालोमं स्वयाः नं अप्वः दुःख बी थें च्वं। छं जि सिपाइँत ब्वना यंकाः वयात लिनायंकी मखुसा व पखाः दुगु शहरय् थ्यन धाःसा व झीपाखें बिस्युं वनी।”

7 अथे जुयाः योआबया मनूत, करेती, पेलेथी व लडाइँ ल्वायेत बल्लाःपिं मनूत अबीशैया ल्यूल्यु वन। इमिसं बिक्रीया काय् शेबायात लीत यरूशलेमं वन।

8 इपिं गिबेनया तःग्वःगु ल्वहंधी लिक्क थ्यंबलय् अमासां इमित नापलात। उबलय् योआबं सिपाइँया वसः पुनातःगु खः। अले वयाके जँनी नं दु। उकी वं दाप नापं छपु चुपि स्वथनातःगु खः। व न्ह्यज्याःबलय् वयाके दुगु दापं चुपि कुतुंवन।

9 अले योआबं अमासायात धाल, “हे जिमि किजा अमासा, छन्त आराम हे दु जुइ मखु ला?” अले योआबं अमासायात चुप्पा नयेत जव ल्हातं वयागु दाही ज्वन।

10 अमासां योआबयाके ल्हातय् चुपि दुगु खँ वास्ता हे याये मफुत। योआबं वयागु प्वाथय् चुपि सुयाबिल अले आतापुति पिहां वयाः बैय् कुतुंवन। वं हाकनं सुइ

म्वाल छायाधाःसा व सी धुंकल। अनंलि योआब व वया किजा अबीशैनं बिक्रीया काय् शेबायात ल्यू वन।

11 योआबया मनूत मध्ये छम्हयसिनं अमासाया सीम्ह लिक्क दनाः तःसलं थथे धाल, “योआब व दाऊदया पाखेयापि फुक्कं योआबया ल्यूल्यू हूँ।”

12 उबल्य अमासाया सीम्ह हिया हि जुयाः मू लैया दथुइ लानाच्वंगु खः। अले व मनुखं सिपाईतय् फुक्क पुचः अन हे च्वनाच्वंगु खन। अनंलि अनं वयाच्वंपि फुक्क मनूत अमासाया सीम्ह दुथाय् दिनाच्वंगु खन। अनंलि वं अमासाया सीम्हयात मूलैय् दथुं साला यंकाः तापाक्क बुँइ वान्छवयाः कापतं त्वपुयाबिल।

13 सीम्हयात मू लैया दथुं सालायके धुंकाः फुक्क मनूत बिक्रीया काय् शेबायात लीत योआबया ल्यूल्यू वन।

14 हाबिल-बेथ-माकाय् मथ्यंतले योआब इस्राएलया फुक्क कुलपाखें व बरीतय् फुक्क देशं जुयाः वन। अले उपि बरीत छथाय् मुनाः सकले वयागु ल्यूल्यू वन।

15 अले योआबया पुचः वयाः शेबायात हाबिल-बेथ-माकाय् घेरय् यात। अले इमिसं शहरयात घेरय् यानातःगु पखालय् थाहां वनेत लै दय्केत ल्वहं व चा द्वांचिन। व पिनेया पखाःया न्हाःने खः। अले पखाः थुनेत इमिसं उकियात हमला यात।

16 अनं छम्ह बुद्धि दुम्ह मिसा पिने पखालय् दनाः तःसलं थथे धाल, “न्यै! न्यै! योआबयात थन वा धयाब्यु, जि वनापं खँ ल्हाये।”

17 अनंलि योआब वयाथाय् लिक्क वल अले व मिसां धाल, “छु छि हे योआब खः ला?”

योआबं लिसः बिल, “खः जि हे योआब खः।”

व मिसां धाल, “स्वयादिसँ, जिगु खँ न्यनादिसँ।”

योआबं धाल, “धयादिसँ, जिं न्यनाच्वनागु दु।”

18 व मिसां धाल, “न्हापा थथे धायेगु चलन दु, ‘हाबिल शहरय् वनाः लिसः ज्वनाः वा’ अले फुक्कसिनं अथे हे याइगु।

19 जिमिगु शहर छगू मू शहर खः। इस्राएलय् थ्व छगू शान्त शहर व राजभक्त शहर खः। छाय् छिसं थ्व शहरयात नाश याये त्यनागु? गुगु शहर परमप्रभुयागु खः, छु छिसं व शहरयात नाश यायेगु ला?”

20 “थ्व जिगुपाखें तापाक्क जुइमा!” योआबं लिसः बिल, “नाश यायेगु खँ जिगुपाखें तापाक्क जुइमा।

21 व जिमिगु बिचा: मखु। तर एफ्राइमया पहाडया देशया छम्ह मनू, बिक्रीया काय् शेबा दाऊद जुजुया विरोध यायेत दंगु दु। व मनूयात जिमिगु ल्हातय् ब्यु अले जि थ्व शहर त्व:ता: वने।”

व मिसां योआबयात धाल, “शेबाया छ्यं प:खालं छिथाय् वांछवयाहइ।”

22 अनंलि व मिसा वन अले फुक्क मुनाच्चं पि मनूतय्त थ:गु बुद्धिया सल्लाह न्यंकल। अले इमिसं बिक्रीया काय् शेबाया छ्यं ध्यना: योआबया न्ह्य:ने वांछवयाबिल। अनंलि योआबं तुरही पुल, अले फुक्क सिपाईत शहर त्व:ता: थथ:गु छैय् लिहां वन। योआब धा:सा जुजुयाथाय् यरूशलेमय् लिहां वन।

23 योआब फुक्क इस्राएली पुच:या सेनापति ख:, अले यहोयादाया काय् बनायाह धा:सा करेती व पेलेथीतय् कप्तान ख:।

24 दास थें ज्या याइपि ज्यामितय्त ज्या याकीगु जिम्मा अदोनीरामयागु ल्हातय् बियात:गु ख:। अहीलूदया काय् यहोशापात जूगु खँ च्वयातइम्ह ख:।

25 शेभा धा:सा छ्यान्जे ख:, अले सादोक व अबियाथार पुजाहारीत ख:।

26 याईरी ईरा धा:सा दाऊदया पुजाहारी ख:।

21

शाऊलया सन्तान स्या:गु

1 दाऊदं शासन यानाच्चंगु इलय् स्वदँ ति अनिकाल जुल। अनंलि दाऊदं परमप्रभुयात मालेगु यात। अले परमप्रभुं धयादिल, “शाऊल व वया घरानाय् हिया द्रुपं ला:गु दु, छाया:सा वं गिबोनीतय्त स्या:गु ख:। अथे जुया: अनिकाल जूगु ख:।”

2 (गिबोनीत इस्राएल कुलयापि मखु। इपि एमोरी वंशया बचयजूपि ख:। इमित इस्राएलीतय्सं बचय् यानातये धका: पाफ:गु ख:। अथे जूसां शाऊलं इस्राएल व यहूदाया निती थ:गु जोशय् इमित नाश यायेगु कुत: या:गु ख:।) अथे जुया: दाऊद जुजुं गिबोनीतय्त स:ता: धाल,

3 “जिं छिमिगु निती छु याये? परमप्रभुया थ: प्रजायात छिमिसं सुवा: बीत जिं गुकथं प्रायश्चित याये फइ?”

4 गिबोनीतय्सं लिस: बिल, “शाऊल व वया घरानानापं जिमिगु ल्वापु लुं व वहलं मिलय यायेगु जिमिके अधिकार मदु, अले इस्राएलय् सुं मनू सीमा धका: नं धायेगु जिमिके अधिकार मदु।”

अनंलि दाऊदं न्यन, “अथे जूसा जिं छिमिगु निती छु यायेगु?”

5 इमिसं जुजुयात लिसः बिल, “शाऊलं जिमित नाश यात, अले जिमिगु विरोधय् ग्वसाः ग्वल, अले जिपिं नाश जुल व इस्राएलय् जिमिगु निंति छगू नं थाय् मन्त,

6 व हे मनूया घरानाया न्हय्म्ह मनूत जिमित ब्यु। अले परमप्रभुं ल्ययातःम्ह जुजु शाऊलया गिबाय् परमप्रभुयागु हे न्ह्यःने जिमिसं इमित स्यानाः निभालय् व फसय् तयाबी।”

अनंलि जुजुं लिसः बिल, “जिं छिमित इपिं बी।”

7 जुजुं दाऊद व शाऊलया काय् जोनाथनं परमप्रभुया न्ह्यःने पाफःगुलि शाऊलया छय, जोनाथनया काय् मपीबोशेतयात बचय् याना तल।

8 तर जुजुं अय्याया म्हाय् रिश्पां शाऊलपाखें बुकूपि निम्ह काय् आरमोनी व मपीबोशेत, अले शाऊलया म्हाय् मेराबं* महोलाती बर्जिल्लैया काय् अद्रीएलपाखें बुकूपि न्याम्ह काय्पि काल।

9 दाऊदं इमित गिबोनीतय्गु ल्हातय् लःल्हाना बिल, अले इमिसं इमित परमप्रभुया न्ह्यःने डाँडाय् स्यानाः इमिगु सीम्ह यख्खानाबिल। इपिं न्हय्म्ह छकलं क्वय् कुतुंवन। इमित तख्ख लयेगु न्हापांगु दिनय् स्याःगु खः।

10 अय्याया म्हाय् रिश्पा इमिगु सीम्ह स्वयेत अन च्वनाच्वन। वं भांग्रा कयाः तख्ख लयेगु शुस्निसें आकाशं वा वयाः इमिगु सीम्हय् मलातले थःगु निंति व तःग्वःगु ल्वहँतय् लासा थें लायातल। अले वं न न्हिनय् आकाशया झंगपँछितयत् वन चान्हय् गुँपशुतयत् उपि सीम्ह नके बिल।

11 शाऊलया मथ्याःम्ह कलाः अय्याया म्हाय् रिश्पां याःगु फुक्क खँ दाऊदयात न्यंकल।

12 अले व वनाः शाऊल व वया काय् जोनाथनया क्वँय् याबेश-गिलादया मनूतपाखें हल। (उपि क्वँय् याबेश-गिलादया मनूतय्सं पलिशतीतय्सं शाऊलयात गिल्बोय् त्याकूगु दिनय् यख्खाःगु थाय् बेथ-शानया चुकं ख्वायंकूगु खः।)

13 वं व थासं शाऊल व जोनाथनया क्वँय् हल, अले यख्खाःपि शाऊलया सन्तानया क्वँय् नं मुकल।

14 इमिसं शाऊल व वया काय् जोनाथनया क्वँय् बेन्यामीनया देशय् सला धाःगु थासय् शाऊलया अबु कीशया चिहानय् थुनाबिल। जुजुं इमित छु छु या धकाः आज्ञा ब्यूगु खः व फुक्क इमिसं यात। अनंलि परमप्रभुं देय्या निंति याःगु प्रार्थनाया लिसः बियादिल।

* 21:8 २१:८ मेराबं गुलि हस्तलिपिइ मिक्कल

पलिशतीतय्गु विरोधय् लडाईं

१ इति २०:४-८

15 हाकनं पलिशती व इस्राएलीतय् दथुइ लडाईं जुल। दाऊद व वया मनूत लडाईं यायेत क्वहां वल तर इपि पलिशतीतनापं लडाईं यानाच्चंबलय् दाऊद तसकं त्यानुचाल।

16 अयनं रफाया सन्तानत मध्ये छम्ह इशबी-बनोबं, सुयाके स्वंगू व बागू किलोग्राम (३.५) कँय्यागु च्वका दुगु भाला दु, वं न्हगु तरवार जँय् घानातःगु दु, वं दाऊदयात स्याये धकाः धाल।

17 उबलय् सस्याहया काय् अबीशै दाऊदयात ग्वाहालि यायेत वल। वं व पलिशतीयात कय्काः स्यात। अनंलि दाऊदया मनूतय्सं इस्राएलया जः हे तनावनी धकाः ग्यानाः दाऊद इपि नापं लडाईंलय् गुबलें वनी मखु धकाः वयागु न्ह्यःने पाफल।

18 उकिया लिपा पलिशतीतलिसें गोबय् लडाईं जुल। उगु लडाईंलय् हशाती सिब्वकै छम्ह सफ नांयाम्ह रफाया सन्तानयात स्यात।

19 पलिशतीतलिसें मेगु लडाईं गोबय् जुल। यारे-ओरगिमया[☆] काय् एल्हानानं गातयाम्ह गोल्थतयात स्यात। गोल्थतया भाला कापः थाइगु तानयागु ताहाकःगु डण्डी थें च्वें।

20 हानं गातय् नं लडाईं जुल। अन ल्हाः व तुतिइ खुपु खुपु पतिचा अर्थात निइप्यपु पतिचा दुम्ह राक्षस थें च्वंम्ह छम्ह मनू दु। व नं रफाया सन्तान खः।

21 वं इस्राएलीतय् हेस्यात, अले दाऊदया दाजु शिमाहया काय् जोनाथनं वयात स्यानाबिल।

22 दाऊद व वया मनूतय्सं स्याःपि थुपि राक्षस थें च्वंपि प्यम्ह गातया रफाया सन्तान खः।

22

दाऊद त्याःगु लसताय् हाःगु भजन

भज १८

1 परमप्रभुं दाऊदयात शाऊल व मेपि इमि फुक्क शत्रुतपाखें बचय् यानादीबलय् वं परमप्रभुया न्ह्यःने हाःगु भजन थथे दु,

2 परमप्रभु जिगु निंति ल्वहंधी थें खः

वय्कः जिगु किल्ला व जितः उद्धार याइम्ह खः।

☆ 21:19 २१:१९ १ इति २०:५

- 3 जिमि परमेश्वर जिगु निंति ल्वहंधी थें खः।
 गुकिं जितः रक्षा याइ।
 वय्कः जिगु ढाल खः।
 वय्कः जितः बचय् याइगु शक्ति खः,
 वय्कः जिगु किल्ला खः,
 वय्कः जि शरण कायेगु थाय् खः।
 छि जितः उद्धार याइम्ह खः,
 छिं हे जितः ग्यानापुपि मनूतपाखें बचय् यानादी।
- 4 जिं परमप्रभुयाके प्रार्थना याये,
 वय्कः प्रशंसा याये बहःम्ह खः,
 वय्कलं जितः जिमि शत्रुतयपाखें बचय् यानादी।
- 5 कालया खिपतं जितः स्वतुमतु स्वय्कल।
 दुःखया खुसिबालं जितः चुइके यंकल।
- 6 पातालया खिपतं जितः प्यखें हीन,
 कालया म्हुतुं जितः पियाच्चन।
- 7 दुःख ज्वलय् जिं परमप्रभुयात लुमंका,
 जिं ग्वाहालिया लागि परमेश्वरयात प्रार्थना याना।
 जिगु प्रार्थना वय्कःया देगलय् थ्यन,
 वय्कलं न्हायपं बियाः जिगु सः न्यनादिल।
- 8 पृथ्वी खात, अले भ्वखाय् ब्वल,
 आकाशया जग क्वारा क्वारा सन्।
 उपि थुरथुर खात, छायाःसा परमेश्वर तम्बयादीगु खः।
- 9 वय्कःया न्हाय्पालं, कुँत्याः पिहां वल।
 वय्कःया म्हुतुप्पालं भस्म याइगु मित्याः व च्यानाच्चंगु ल्वहं ह्यंग्वाः पिहां वल।
- 10 वय्कः आकाश ह्वखनाः कुहां झाल।
 वय्कःया पालि तःलय् हाकुगु सुपौँय् दु।
- 11 वय्कः करूबया म्हय् च्वनाः ब्वयाझाल।
 वय्कः फय्या पपुतिइ च्वनाः ब्वयाझाल।
- 12 वय्कलं थःत खिउँनं त्वपुल।
 अले हाकुगु सुपौँचं थःत भुन।
- 13 वय्कःया न्ह्यःनेया मिजलां

- मिया हांग्वा: हाना हाना च्यात
 14 अले स्वर्ग परमप्रभु थ्वयक हालादिल,
 दक्वसिबय् त:धंम्हय्सिगु स: ताये दत।
 15 वय्कलं थ:गु वाण त्व:ता: थ: शत्रुतय्त उखेंथुखें यानादिल।
 वय्कलं मलखं कय्का: इमित बुकादिल।
 16 हे परमप्रभु! छिं तमं ब्व:बियादीगुलि
 अले छिगु न्हाय्प्वालं पिहां व:गु मित्यालं
 समुद्रया बैं व पृथ्वीया जग खनेदत।
 17 वय्कलं आकाशं कुहां झाया: जित: ज्वनादिल।
 वय्कलं जित: त:जा:गु समुद्रं थकयादिल।
 18 वय्कलं जित: जिमि बल्ला:पिं शत्रुतय्पाखें बचय् यानादिल,
 अले जित: महीपिं जि स्वया: बल्ला:पिं फुक्कपाखें नं बचय् यानादिल।
 19 जित: थाकुगु इलय् इमिसं जित: हय्क्का: वल,
 अय्त्तं परमप्रभुं जित: बचय् यानादिल।
 20 वय्कलं जित: सुरक्षित थासय् यंकादिल,
 वय्कलं जित: उद्धार यानादिल छाया:सा वय्क: जिलिसें लय्तायादीगु दु।
 21 जिं भिं यानाजुयागुलि
 परमप्रभुं नं जित: भिं यानादिल।
 अले जि दोष मदुम्ह जूगुलि
 वय्कलं जित: आशिष बियादिल,
 22 छाया:सा जि परमप्रभुया लैय् जुयाच्चवनागु दु।
 अले जि जिम्ह परमेश्वरपाखें गुबलें नं फहिलामवना।
 23 जिं न्हाबलें वय्क:या व्यवस्था मानय् यानागु दु,
 वय्क:या उजंयात न्हाबलें न्यनागु दु।
 24 जि दोष मदुम्ह धका: वय्कलं स्यू
 अले पापं चिलाच्चवनागु दु।
 25 जिं भिं यानाजुयागुलि व जि दोष मदुम्ह जूगुलि
 परमप्रभुं जित: भिं यानादिल।
 26 हे परमप्रभु! भलसा दुपिलिसे छि थ: नं भलसा दुम्ह हे जुयादी।
 अले इमान्दारपिलिसे इमान्दार हे जुयादी।
 27 शुद्ध नुग: दुपिं मनूतय्त छिं थ:त शुद्ध क्यनादी,

- तर मभिंपिं मनुतनापं छि चलाख जुयादी।
- 28 क्वमिलुपिन्त छिं बचय् यानादी,
तःधंछुया जुइपिन्त धाःसा क्वह्यंकादी।
- 29 हे परमप्रभु! छिं जिगु नितिं मत च्याकादी
छिं खिउँ मदय्काः जितः जः क्यनादी।
- 30 छिगु ग्वाहालि जिं शत्रुतय्गु पुचलय् नं हय्काये फु
अले जिमि परमेश्वरया ग्वाहालि जिं न्ह्याथें ज्याःगु पःखाः नं गये फु।
- 31 परमेश्वरया लँपु सिद्धगु लँपु खः।
वय्कःया वचन सत्य खः।
वय्कःया शरणय् वंपिनिगु नितिं वय्कः ढाल खः।
- 32 उकिं परमप्रभु बाहेक मेम्ह सु परमेश्वर दु?
झी परमेश्वर बाहेक मेम्ह सु ल्वहंधी दु?
- 33 व हे परमेश्वर, सुनां जितः बल्लाकल,
अले सुनां जिगु लँपुयात तप्यंकाबिल।
- 34 वय्कलं जिगु तुतियात चल्लायागु तुति थें यानादी।
अले जि ततःजाःथाय् नं तुति चुयाच्चने फइ।
- 35 वय्कलं जिगु ल्हाःयात ल्वायेगु कलाः स्यनादी
वय्कलं जिगु लपुयात कँय्यागु धनु साले फय्केत बल्लाकादी।
- 36 हे परमप्रभु! छिं जितः थःगु ढाल बियाः बचय् यानादीगु दु।
छिगु ग्वाहालि जितः तःधंकादीगु दु।
- 37 छिं जिगु तुतिया नितिं गाक्क थाय् बियादीगु दु।
अले जि गुबलें नं क्वःदःगु मदु।
- 38 जिं थः शत्रुतय् लितुलिनाः ज्वना,
अले इपिं फुक्कसित नाश मयातले जि लिहां मवया।
- 39 जिं इमित दने हे मफयेक क्वथला
इपिं जिगु तुतिइ क्वदल।
- 40 छिं जितः ल्वायेत बल बियादीगु दु।
अले जिमि शत्रुतय् जिगु तुतिइ तयादीगु दु।
- 41 छिं जिमि शत्रुतय् जिगु न्ह्यःनं ख्यानाछवत।
जितः महीपिन्त जिं नाश याना।
- 42 इपिं ग्वाहालिया नितिं हाल,

- अयनं इमित सुनानं बचय् याः मवः ।
 इमिसं परमप्रभुयात सःतल,
 अयनं वयक्कलं लिसः बियामदी ।
 43 जिं इमित धू जुइक् दाय़ा ।
 मनूतयसं लैय् ध्याचःयात न्हुतुन्हुगु थें
 जिं इमित न्हुतुन्हुया ।
 44 छिं जितः विद्रोहीतयपाखें बचय् यानादिल,
 जाति जातितय् जुजु यानादिल ।
 जिं म्हमस्युपिं मनूत नं आः जिगु अधीनय् जुल ।
 45 मेगु जातियापिं मनूत नं जिगु न्ह्यःने क्वछुइ
 अले जिं धाःथें च्वनी ।
 46 थःगु साहस तंकाः
 इपिं थःपिनिगु किल्लां ग्याग्यां पिहां वल ।
 47 जिगु ल्वहंधी परमप्रभुया प्रशंसा या,
 वयक्कः म्वानाच्चंम्ह परमप्रभु खः ।
 जिगु ल्वहंधी जिमि परमेश्वरयात तःधंकि,
 वयक्कलं जितः बचय् यानादी ।
 48 वयक्कलं जितः जिमि शत्रुतलिसे बदला कयादी ।
 वयक्कलं जाति-जातियात जिगु अधीनय् तयादी ।
 49 अले जितः जिमि शत्रुतयपाखें त्वःतकादिल ।
 जितः जिमि शत्रुत स्वयाः तःधंकादिल ।
 जितः मनू स्याना जुइपिनिपाखें बचय् यानादिल ।
 50 उकिं हे परमप्रभु, जिं जात जातियापिनि दथुइ छिगु प्रशंसा याये ।
 छिगु नामय् भजन हाले ।
 51 छिं थःम्हं ल्यःम्ह जुजुयात ततःधंगु ल्वापु त्याके बियादी ।
 छिं थःम्हं अभिषेक यानादीम्हयसित
 न्ह्याबलें माया यानादी, दाऊदयात व वया सन्तानतय्त ।

23

दाऊदया दक्कलय् लिपांगु वचन

- 1 दाऊदयागु दक्कलय् लिपांगु वचन थुपिं हे खः -

यिशैया काय् दाऊदं धाःगु खँ थ्व हे खः,
 व मनुखं धाःगु खँ, सुयात परमेश्वरं तःधंकादिल,
 सुयात याकूबया परमेश्वरं जुजु अभिषेक यानादिल,
 सु इस्राएलया भजनत हालिम्ह खः,
 वयागु वचन —

2 परमप्रभुया आत्मां जिके जुयाः नवानादिल,
 वय्कःया वचन जिगु म्हुतुइ हे दु।

3 इस्राएलया परमेश्वर नवानादिल,
 इस्राएलयात ल्वहंधी थें रक्षा यानादीम्हं जितः धयादिल,
 “गुम्हयूसिनं धार्मिकताकथं न्याय याइ,
 अले परमेश्वरया भय कयाः शासन याइ,

4 व सुपाँय् मदुबलय्या सुथसियागु निभाजः थें खः।
 व वा वये धुंकाः जमिनं घाँय् बुइकीगु जः थें खः।”

5 छु जिगु घराना परमेश्वरलिसें ठीक मजू ला?
 छु वय्कलं जिलिसें फुक्क खँय् सुरक्षित व बल्लाःगु छगू न्ह्याबलेया बाचा
 चिनादीगु मदु ला?

छु वय्कलं जितः ग्वाहालि मालीबलय् उद्गार यानाः मदी ला?
 अले जिगु फुक्क इच्छा पूर्वकामदी ला?

6 तर मभिपि मनुत फुक्क कं थें वांछवइ,
 सुनानं व कंमायात खालि ल्हातं मुंके फइ मखु।

7 नयागु ल्वाभः वा भाला छ्यलेगु यायेमाः।
 कंमा गन मुंकेगु याइ अन हे उकियात छवय्की।

दाऊदया नांजाःपिं बहादुर सिपाईत

१ इति ११:१०-४१

8 दाऊदया नांजाःपिं बहादुर सिपाईतयगु नां धलः थथे दु —

दकलय् न्हापां तहकमोनीपाखें योशब-बश्शेबेत* खः — थ्व स्वम्ह बहादुर
 सिपाईत मध्ये छम्ह खः। वं च्यासः मनूतय्त छकलं हमला यानाः भालां उपि
 फुक्कसित स्यानाबिल।

* 23:8 २३:८-३९ योशब-बश्शेबेत छु सेप्टुजेन्ट हस्तलिपि कथं योशब-बश्शेबेत धाःम्ह इसबाल खः १ इति

9 उपिं स्वम्ह बहादुर सिपाईंत मध्ये निम्हम्ह अहोही दोंदेया काय् एलाजार खः। व दाऊदनापं पास-दम्मीमय् दुगु खः, गुगु थासय् लडाईं यायेत मुपिं पलिशतीतयत् इमिसं चुनौती ब्यूगु खः। इस्राएलीत बिस्युं वंबलय् व याकःचा हे दनाः लडाईं जूगु थासय् ल्वानाच्चन।

10 वं त्यानु मचातले हे पलिशतीतयत् तरवारं हमला याना तुं च्वन। लिपा वं थःगु ल्हातं तरवार तक नं त्वःते मफुत। थुकथं उखुन्हु परमप्रभुं इस्राएलीतयत् त्याकादिल। अनंलि इस्राएलया मनूत सीपिन्त लुतय् यायेत जक एलाजारयाथाय् लिहां वल।

11 अले स्वम्हम्ह बहादुर हरारी आगीया काय् शम्मा खः। पलिशतीत दालया तसकं बांलाःगु बुँइ इवःलाक मुनाच्चंगु खः। अनंलि इस्राएलीत पलिशतीतपाखें बिस्युं वन।

12 शम्मा धाःसा व बुँया दथुइ हे दनाच्चन अले व बुँया रक्षा यानाच्चन। अनंलि पलिशतीतयत् हमला यात। थुकथं परमप्रभुं तःधंगु विजय बियादिल।

13 बुँइ सःगु लयेगु ई शुरु जूबलय् स्विम्ह मू सिपाईंत मध्ये तसकं नांजाःपिं स्वम्ह सिपाईंत अदुल्लामया गुफाया लिक्क लाःगु ल्वहं तलय् दाऊदयाथाय् क्वहां वन। पलिशतीतयगु मेगु पुचः रपाईमया ब्यासिइ छाउनी दयकाः च्वनाच्चंगु खः।

14 उबलय् दाऊद किल्लाया दु, अले छपुचः पलिशतीतय् सिपाईंत बेथलेहेमय् च्वनाच्चंगु खः।

15 छन्हु दाऊदयात तसकं प्याः चाल, अले वं हालाः धाल, “बेथलेहेमया मू ध्वाखा लिक्क च्वंगु तुंया लः त्वने दःसा ज्यूगु।”

16 अथे जुयाः उपिं स्वम्ह बहादुर सिपाईंत पलिशतीतयगु दथुं दुहां वनाः बेथलेहेमया ध्वाखाया लिक्क च्वंगु तुंथिं लः कयाः हयाः दाऊदयात बिल। तर दाऊद व लः त्वने म्हाः धाल। अले परमप्रभुया न्ह्यःने व लः प्वंकाः वं थथे धाल,

17 “हे परमप्रभु, जिं थ्व लः त्वने म्वालेमा। छु जिं थुपिं मनूतयगु हि त्वनेगु ला? थुमिसं थ्व लः थःगु ज्यान पाना हःगु खः।” उकिं वं व लः त्वनेत म्हाः धाल।

थुपिं स्वम्ह बहादुर सिपाईंतयसं अज्याःगु तःधंगु ज्या याःगु खः।

18 सस्याहया काय् योआबया किजा अबीशै उपिं स्विम्हयसिया नायः खः। छकः वं भालां स्वसःम्हयसित स्यात, उकिं व उपिं स्वम्ह थें हे नांजाःम्ह मनू जुल।

19 उपिं स्वम्ह स्वयाः वयात यक्व इज्जत दयाः इमि नायः जुल तर उपिं स्वम्ह मध्ये छम्ह धाःसा मजुल।

20 यहोयादाया काय् कब्सेलयाम्ह बनायाह नं छम्ह बहादुर सिपाईं खः। वं यक्व बहादुर ज्या याःगु दु। मोआबयापिं निम्ह दकलय् ल्वायेसःपिं सिपाईंतयत् स्याःम्ह

व हे खः। छकः च्वापु गायाच्चंबलय् वं छगू गालय् क्वहां वनाः छम्ह सिंहयात स्यानाबिल।

21 वं तसकं तःधिकःम्ह छम्ह मिश्रीयात नं स्यात, वयागु ल्हातय् छगू भाला दु। बनायाहं ल्हातय् छपु तपुगु कथि ज्वनाः वयात हमला यात। अले व मिश्रीया ल्हातं भाला लाकाकयाः उकिं वयात हे स्यानाबिल।

22 यहोयादाया काय् बनायाहं अज्याःगु तःधंगु ज्या याःगु खः। व उपि स्वम्ह बहादुर सिपाईत थें हे नांजाःम्ह सिपाई जुल।

23 उपि स्विम्ह मनू स्वयाः वयात यक्व इज्जत दत। तर व स्वम्ह मध्ये छम्ह मजू। वयात दाऊदं थः अङ्गरक्षकतय् नायः ल्यल।

24 स्विम्ह बहादुर सिपाईत थुपि हे खः —

योआबया किजा असाहेल,

बेथलेहेमयाम्ह दोदैया काय् एल्हानान,

25 हरोदी शम्मा, हरोदी एलीका,

26 पल्ली हेलेस,

तकोयाम्ह इक्केशया काय् ईरा,

27 अनातोतयाम्ह अबीएजेर,

हशाती मबुन्ने,

28 अहोही सल्मोन,

नतोपाती महैरै,

29 नतोपाती बानाहया काय् हेलेद,

अले बेन्यामीन गिबायाम्ह रीबिया काय् ईथै,

30 पिरातोनी बनायाह, गाशया न्हसिकापयाम्ह हिदै,

31 अर्बाती अब्बी-अल्बोन, बरहमी अज्मावेत

32 शाल्बोनी एल्याहबा, याशेनया काय्पि, जोनाथन,

33 हरारी शम्मा, हरारी शरारया काय् अहीआम,

34 माकाती आहसबैया काय् एलीपिलेत,

गीलोनी अहीतोपेलया काय् एलीआम,

35 कर्मेलयाम्ह हेस्रो, अर्बी पोरै,

36 सोबायाम्ह नातानया काय् यिगाल, हग्रीया काय्,

37 अम्मोनी सेलेक, बेरोती नहैरै,

गुम्ह सरूयाहया काय् योआबया ल्वाभः ज्वनीम्ह खः,

38 यित्री ईरा, यित्री गारेब,
 39 अले हिती उरियाह।
 फुककं याना: स्विन्हयम्ह नांजा:पि बहादुर सिपाईत दु।

24

दाऊदं मनूत ल्या: खा:गु

१ इति २१:१-३, ८-२६

1 हाकनं परमप्रभु इस्राएलीतपाखें तंम्वयादिल अले दाऊदपाखें इस्राएलीतयत दु:खकष्ट बियादिल। अले परमप्रभुं दाऊदयात धयादिल, “वना: इस्राएल व यहदाया मनूत ल्या:खा।”

2 अथे जुया: दाऊदं योआब व थ: सेनाया कप्तानतयत थथे धाल, “फुकक इस्राएल देशय दच्छिनय् च्वंगु बेर्शेबा शहरनिसें उत्तरय दान तक हूं, लडाईं यायेफुपि मनूत ल्या: खाना: जित: धा। अले इपि ग्व:म्ह दु धका: जिं सीके फइ।”

3 योआबं लिस: बिल, “परमप्रभु छिकपिनि परमेश्वरं मनूतयगु ल्या: सछिदुगं अप्व: यानाबीमा। जिमि मालिक जुजुं व फुकक खनेमा। तर जिमि मालिक महाराजयात थथे छाया याये मास्ति व:गु?”

4 अयनं जुजुं योआब व सेनापतितयत मनूतयगु ल्या: मकायक मज्यू धाल। उकिं इपि वना: इस्राएल न्यंक चा:हिला: मनूत ल्या: खायेत जुजुया न्ह्य:नं वन।

5 अनंलि इपि यर्दन पुलावन, अरोएरनेर शहरया दच्छिन पाखेया खुसि लिक्क पाल ग्वल, अले गाद जुया: याजेर तक हे न्ह्यज्यात।

6 अले इपि गिलाद व तातीम-होदशी, दान-यान व सीदोन चा:हिला: न्ह्यज्यात।

7 अनं इपि टुरोसया किल्ला तक हे वन, अले हिव्वी व कनानीतयगु फुकक शहरय वन। अनंलि इपि यहदाया नेगेव धा:गु दच्छिन देशया बेर्शेबाय वन।

8 थुकथं इपि फुकक देश चा:हिल। थथे गुला व निइन्ह दये धुंका: यस्शलेमय लिहां वल।

9 अले योआबं सेनाय ज्या यायेफुपि ग्व:म्ह मनू दु धका: जुजुयात कन। सिपाईं जुया: ज्या यायेफुपिं मिजंत इस्राएलय च्यागू लाख (८,००,०००) व यहदाय न्यागू लाख (५,००,०००) मनूत दु।

परमप्रभुं दाऊदया पापया न्याय या:गु

10 मनूत ल्याः खाये सिधःबलय् दाऊदया मनं खँ ल्हात, अले वं परमप्रभुयात धाल, “जिं थथे यानाः तःधंगु पाप यानागु दु। हे परमप्रभु, आः जितः क्षमा यानादिसँ धकाः बिन्ति याये। जिं मूर्ख ज्या यानागु दु।”

11 कन्हय् सुथय् दाऊद दंबलय् परमप्रभुया वचन अगमवत्ता गादयात थ्यन,

12 “वनाः दाऊदयात थथे धा, परमप्रभुं थथे धयादी, ‘जिं वयात स्वंगू खँ ल्ययेगु मौका बी। अले वं छु ल्यइ जिं व हे याये।’ ”

13 अले गादं दाऊदयाथाय् वनाः हाकनं व हे खँ धाल, “परमप्रभुं थथे धयादी – ‘छन्त छु यः व ल्य – स्वंगू दँया अनिकाल, वा स्वला तक शत्रुतपाखें बिस्युं जुयेगु, वा स्वन्हु तक इस्राएलय् महामारी जुइगु।’ आः जिं परमप्रभुयात छु लिसः बीगु खः व छिं क्वःछिनादिसँ।”

14 दाऊदं गादयात लिसः बिल, “जि तसकं आपतय लाःगु दु। जितः परमप्रभुया ल्हातय् हे लाके ब्यु। छायाःसा वय्कः तसकं दयादुम्ह खः। तर जि मनूतयगु ल्हातय लाये म्वाःलेमा।”

15 उकिं सुथनिसें क्वःछिनातःगु ई तक परमप्रभुं इस्राएल न्यंकं छगू महामारी छवयाहयादिल। दाननिसें कयाः बेशेबा तक न्हयेदुः (७०,०००) मनूत महामारी कयाः सित।

16 परमप्रभुया दूतं यरूशलेमयात नाश यायेत ल्हाः ल्हन, अयनं परमप्रभुं मनूतयत नाश यायेगुपाखें दया यानादिल, अले नाश यायेत वःम्ह स्वर्गदूतयात परमप्रभुं धयादिल, “म्वाल, गात। नाश यायेगु दिकि!” उबलय् दूत यबूसी अरौनाया अन्न दायेगु खलाया लिक्क थ्यंगु खः।

17 अले दाऊदं मनूतयत स्यानाच्चवंम्ह स्वर्गदूतयात खन अले वं परमप्रभुयात धाल, “पाप यानाम्ह जि खः। टुंकाःगु जिं खः। थुपि फैत थें छुं मस्यूपिन्सं छु याःगु दु धकाः? हे परमप्रभु जिमि परमेश्वर, जि व जिमि परिवारयात सजाँय बियादिसँ। अयनं थ्व विपत्ति छिकपिनि मनूतयके मलायेमा।”

दाऊदं वेदी दय्कूगु

18 उखुन्हु हे गाद दाऊदयाथाय् वनाः वयात थथे धाल, “यबूसी अरौनाया खलाय् थहां वनाः परमप्रभुया निंति छगू वेदी दय्कि।”

19 दाऊदं परमप्रभुया उजं मानय् यात अले गादं धाःथें थाहां वन।

20 भचा लिपा अन दाऊद थयंकः वल। अरौनां जुजुयात खनेवं खला त्वःता वल अले बँय् भवसुलाः दाऊदयात भागियानाः धाल, “छसपोल, छाय् छसपोलया दासयात नापलायेत झायागु?”

21 दाऊदं वयात धाल, “छं जितः छंगु खला म्यु। थ्व महामारी पनेत अन परमप्रभुया नितिं छगू वेदी दय्के।”

22 अरौनानं दाऊदयात धाल, “महाराज, कयादिसँ! छितः छुं याये मास्ति वः व यानादिसँ। जिं छितः होमबलिया लागि द्रुहंत व सिँया लागिं अन्न दायेगु पाता व जुवा बी।”

23 अरौनानं थुपिं फुक्क जुजुयात बियाः धाल, “परमप्रभु छिकपिनि परमेश्वरं छिसं छाःगु बलि नाला कयादीमा!”

24 तर जुजुं वयात लिसः बिल, “मखु, जिं छन्त पूरा मू बी। छंगु सामान कयाः सितिकं लाःगु सामानं परमप्रभुयात होमबलि छायेगु मखु।” अथे जुयाः दाऊदं खला व द्रुहंत वहःयागु नेय्गू शेकेल* बियाः न्यात।

25 अन वं परमप्रभुया नितिं छगू वेदी दय्काः होमबलि व मेलबलि छाल। परमप्रभुं देशया नितिं वं याःगु प्रार्थना न्यनादिल अले इस्राएल्य् जूगु महामारी दित।

* 24:24 २४:२४ नेय्गू शेकेल ५७५ ग्राम ति

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7